

67
16
481

第十

0^m 1 2 3 4 5 6 7 8 9 60¹ 0^m 1 2 3 4

始



東洋書院藏本

皇清奏議卷四十四

請錫謚典以表忠烈疏乾隆十一年于敏中

提督浙江學政臣于敏中謹奏為請錫謚典以表忠烈事竊惟人臣之大節無過致身盛明之殊恩莫如追卹蓋易名之典所以顯微闡幽表揚忠烈上追百世而下垂萬世者也矧其勁節凜於風霜鴻名光於日月慷慨從容同時並著孤忠潛德累世弗彰久在聖明洞鑒中如明臣齊泰黃子澄方孝孺練子寧鐵鉉諸人乎明建文帝之事人情共憤直筆無聞欣逢我皇上御極之初特詔廷臣集議復其建文四年之年號錫以恭閔惠皇帝之隆稱古聖王興滅繼絕之典未有若此之盛者也至其一時死事諸臣如泰等雖削藩之議起于鼂錯要不可謂非孝景忠臣乃惠帝未獲劉氏一日之安而諸臣

庫籍整理處寄贈本



且倍鼂氏非常之慘若孝孺子寧等或謀參帷幄或功在疆場總皆被禍五刑且誅沉十族稽之史冊殆於未聞臣今年歲試台州道經寧海縣孝孺故里入祠展拜見其木主皆無謚號及恭閱新修明史列傳第二十九卷至三十一卷齊泰以下同時死事者共載有三卷皆謚法缺如竊思齊泰諸臣之節炳於天壤乃並受闔門之禍未邀兩字之榮豈非惠帝君臣久屈於明朝一代忌諱之私而待伸於我 皇上千秋藻鑑之神乎可否恭請 聖明特頒諭旨 勅下廷臣照明史所錄齊泰以下三卷死事之人按其行事考其本末擇其尤烈者酌加贈謚則當年之孤忠以卹 聖世之盛典以光不惟顯微闡幽遠逾澤及枯骨之仁而于綱常風化亦萬世有裨也

籌邊防疏 乾隆十一年

鄂彌達

湖廣總督臣鄂彌達謹 奏為密陳芻見俯候 聖裁事臣竊惟邊防不可疎兵威不可挫今 國家四夷賓服而藐茲瞻對悍然為梗所貴討貳萌銷振 天家之軍聲而示以震疊也賊夷準噶爾包藏禍心往者擾我哈密軍營羅卜藏丹津乘機肆逆仰賴 聖武布昭使賊夷遠遁而其不軌之謀日甚一日彼以為連年生釁糜我之糧折我之卒彼得以坐待其敝觀其專事剽擄詭計顯然今之瞻對恐亦即準噶爾所使以靡敝中國且以覘我之虛實者也 臣查瞻對逼近西海及各種番夷而羅卜藏丹津久已逃入準噶爾今日瞻對之跳梁安知非羅卜藏丹津之慫恿且狡賊百計勾結內地之人探報信息沿邊一帶如逆酋班滾者正復不少賊之伎倆原欲使各處震駭然後偵隙而動臣聞戰不必勝不苟交及今大軍已出因

賊巢堅固不能即奏膚功恐日久師勞徒露我之弱形張彼之驕心設再有如瞻對者更難一時綏靖瞻對不殲為患滋大 臣查巴蜀素號險峻而瞻對枕石倚山懸崖陡絕負嵎之固罕有其倫逆酋壘石為屋號曰碉房牆垣堅厚層疊崇峩每層架砌箭眼施放鎗炮似此依險跋扈我師難免逡巡 臣思不暫費者不久安輓粟飛芻應所不惜然而師行十萬日費千金我不能深入其阻徑搗賊巢所向無成損威貶重今出師已久必須能勦而後撫始有以警其心膽苟不能直犁其庭遽議招撫將來蠢爾者益無忌憚若目今不能即勦大兵在外年餘已有師老之勢莫若聲言撤回一面於文武員弁中擇其熟識附近番夷並洞悉彼中地利情形者多施金幣厚結各酋以離間其黨或誘之使出或藉為內應俟有可乘之機然後另選精銳且

勦且撫以示 天威俾各處賊徒畏威懷德為一勞永逸之舉而 臣所總總過計者則尤在慎固邊防以遏蠻酋與賊夷之聲息謹查噶斯地方為邊外準噶爾往來青海之咽喉而蠻酋與賊夷全賴此以聯絡其聲勢 臣請於噶斯完城練兵建築砲臺以峻番夷出入之防如此則小醜之聲勢既絕而巨寇之黨與亦孤虜雖強悍必自折困若不及今飭勵戰守將犯順者得氣而覬覦日滋瞻對其小焉者也再查西寧乃番夷雜處之地而準噶爾之人頻來貿易實為厲階杜漸防微不可不慎 臣曩昔於川陝總督任內留心察訪畧悉要害 臣思軍國大事非可妄議但身為大吏受 恩深重苟有知見何敢緘默不言謹冒昧密陳伏乞 睿鑒

請酌省簿書疏乾隆十一年

王安國

禮部尚書臣王安國謹奏為請酌省無益之簿書以清吏治以收實效事臣於本月十九日蒙聖恩召對一時冒昧陳奏以中外簿書太繁州縣官疲於查造登答無暇及農桑教育胥吏倚法作奸滋弊轉甚但議及省繁就簡又恐人心即於懈弛仰祈皇上教諭部院及督撫大臣留心體察隨事減省面奉德音以教諭未必人人體悉或致誤會令臣告諸軍機房大學士酌量可行之道並令臣繕摺具奏臣隨至軍機房向大學士訥親張廷玉敬述聖旨退而思之臣前奏簿書太繁者乃用法之流弊非立法之本意也夫立法之本意所以課功核實而防奸偽也但用之不善則本以課功或因瑣細而轉致羈遲本以核實或不勝煩數而應以具文本以防奸乃本病未去而他病叢生其事不外乎錢穀刑名其弊莫甚

於文書駁覈其源始於內部曹司其流極乎藩臬州縣甚至州縣書役藩臬掾吏聲氣相通而本官反仰其鼻息不得已因而用之以求上下之無阻欲其決吏胥壅蔽知小民疾苦何可得哉臣愚以為不加分晰而概議減省誠恐不知者妄測聖意務為省事而因以即於懈弛若指明弊端剔而去之使弊去而法行不惟與苟安玩愒之風不相涉其於聖明勵精圖治之意似可仰體萬一焉謹以臣所知者臚列具奏如報銷錢糧存留與動支數目不符向經戶部駁查多有逐案登答以某事案內先准銷若干者伏思在外動支無不題咨有案或以案牘浩繁戶部一時無暇遍查似可行令督撫於奏銷時備細聲明戶部查對相符即可准銷至數目之訛舛或在數兩數十兩以上自當照例駁查若止毫釐以上數星以下此不過寫

算之偶錯似可核明更正行令於下次奏銷時聲明又報銷工程如所開價值全數含混或開明而浮冒過多工部自然照例駁查若一冊之內止一二條不清似可摘出行令登答其餘准其開銷不必籠統駁飭發回全冊另造浮開之數如畸零無幾似可竟行核減將核減之數行明其餘准其開銷如此則駁詰登答之無益者可省矣然此猶其易見者也其最細而不勝舉者莫如撫藩之於州縣一徵存而頭緒紛如一動支而項款各別一興修而初估復估完工核銷詳報不一每詳一次必由府而道而司而督撫干涉糧鹽廩膳兵餉者更由糧鹽兩道學政該管武職清軍同知糧運通判每衙門有詳文有書冊有實數冊有印結有加結彙於司而題咨於督撫未題未咨之先司府之駁詰已不一而足或數目之差僅止分釐或訛誤之處

不過字畫或月日錯填或語句遺落或敘述牌行未及詳備初無關於緊要但有名可借皆嚴駁更改每駁一次則申詳冊結之經由各衙門者必皆另造申送至再至三一案如此積至數案有不叢脞困憊者乎又如命盜案件犯事失事有報檢驗獲犯有報初審覆審有報至於州縣審定解府解司苟府司已經審訊或詳聞全招實有疑竇駁令再審亦欽卹重刑之道乃有幕賓書吏逞其私知畧大端而搜枝節執一隅而概全招雖任意指摘毫不中情州縣官亦必逐條答覆人犯往返難免拖累而詳驗招冊之重複增添不待言矣查承審造冊各有程限一涉遲延例有降罰司府既經駁核即可自脫考成而州縣無所逃避掾吏有權可操因而肆為威福州縣功名念切敢不應其取求此臣所謂簿書太繁皆用法之流弊也伏乞 皇

上密諭部院大臣有如臣所奏戶工二部情形者必期相宜整頓並嚴飭各省督撫不時稽查倘司府掾吏弄權苛駁積至數案則提治其掾吏本官如徇庇抗違則分別參奏務令國家科條法則不至為舞文作奸者所矯託官司之精神血脈不至為貪胥猾吏所驅使上下衙門明白相承盡化其疑阻留難之迹而專心於國計民生早作夜思期自效於職守於以勵其名節策其奮庸吏治肅而實效彰天下吏民受皇上之福庇於無既矣

備陳太湖情形疏乾隆十一年

陳大受

江蘇巡撫降二級留任臣陳大受謹奏為備陳太湖情形敬抒末議仰祈睿鑒事竊照太湖為東南巨浸跨連江浙兩省周遭數百里湖濱接壤江南則蘇州府屬之長洲吳縣吳江震澤常州府屬之無錫陽湖宜興荆溪浙

江則湖州府屬之烏程長興等十邑其水源發自天目經杭湖常三府地界總匯於湖支流派別曰淩曰瀆曰浦曰門曰口者不下二三百處宵小易於潛踪出沒至湖中之山亦發脈於天目起伏環結自西北迤邐而至東南所指名者七十有二而馬蹟東洞庭西洞庭三山其尤著者也馬蹟峙湖之北隅周一百餘里支分二十三灣居民萬餘戶西洞庭居湖之中央周七八十里支分三十餘灣居民亦萬餘戶東洞庭在湖之東南隅周五十餘里支分二十餘灣居民三萬餘戶田畝雖少蘆蕩果園鱗次櫛比鄉里之間衢巷曲折雞犬相聞號稱繁庶而湖邊迤西一帶宜興長興諸山綿亘最為險遠逋逃竄匿其間往往入湖為行旅之害此太湖水陸之形勢也防範之道以會哨巡緝為第一要務溯查舊制先設江浙太湖營遊擊一員駐劄

西山居中調度兼轄兩省湖面雍正年間江南添設叅將一員駐劄東山將先設遊擊專隸浙江各分疆界管理繼又將太湖同知移駐東山兼司督捕所以措置頻煩者因該處為澤國要區縱當無事之時不可不長慮却顧也然臣竊有議焉全湖汎守原係一局大員總轄則呼應靈而責成專分員各管則推諉多而緝捕懈此事勢之必然者况太湖江浙分界處所不過就湖面約計非如陸路之可以定立確界也偶有失事或以地界未清彼此互諉各自通詳上司咨移會勘動至數月難免歧誤且江省叅將僅駐湖東南之東山一隅所轄沿邊湖境遼闊頗有鞭長不及之慮浙省遊擊駐於西山乃江南之地而所管係浙江之汎亦覺參差伏查浙閩交界所設楓林營係兼管兩省汎地閩粵之南澳鎮亦兼閩粵之銜分汎防守臣愚以為

應將太湖營叅將裁改專設副將一員兼江浙之銜統轄全湖駐劄西山居中控制其遊擊一員改為都司同原設之守備千把各官分防各汎仍照江浙原舊地面管理調考官兵支領錢糧等事均照分隸兩省舊制衙署不必更兼廉俸所增甚微如此則責任專一聲勢聯絡可無推諉懈弛之患似於經理之方更有裨益臣既有所見理合恭摺具奏伏祈 皇上睿鑒可否 勅下江浙兩省督提諸臣再妥酌議覆請 旨遵行

請慎簡郡守疏乾隆十一年 程盛修

巡視東城刑科掌印給事中臣程盛修謹 奏為知府之責任匪輕請叅酌揀發試用之法以重方面以勵實效事據兩江督臣尹繼善奏稱江甯府知府官保不宜外任請送部酌用揚州府知府高士鑰精力衰憊請勒令休致俱

得旨遵行伏讀 上諭知府承上接下一郡民生休戚係焉所應留心甄別不可使不稱職者廁位重累吾民大哉 王言蒼生之幸也直省督撫受 皇上之倚毗自當仰體 聖懷悉心訪察稱者留不稱者去尚敢褒譏失實徇庇姑容人孰無良斷不至此而臣有一得之愚敬獻 黼扆伏祈採擇夫天下事與其補救於將來不若慎簡於始進與其程功於難必之勢不若收效於已試之人向來知府由部郎俸深選授由同知論俸推陞引見之時 聖明睿照美惡畢陳此不待臣言者也其三項四項相兼夾單進呈或起服銓補或奉 旨特放 宸衷獨斷高下在心亦無待臣言者也 臣鯁鯁於始進之日與已試之人者正自有說從來知府賢則屬員不能不才而田野以闢學校以興善良以安奸宄以去一

郡如是一省皆然一省如是天下皆然太平有象不亦可乎不寧惟是督撫遠駐省城耳目難周州縣之糾彈薦剡爰咨爰度惟知府最親使非嚴氣正性不可以私干鑑空衡平不可以術售安能倚為腹心資為臂指而黜幽陟明無所施而不當哉方今一州一邑周詳審擇尚屢屢於 帝心而知府大員揀發試用更不嫌其慎重每見知府出缺之期近者數月遠者半年一年其大較也中間攝篆之員未必盡當即當矣新任初蒞倘復平常畫戟朱旂浮沉歲月方以不稱撤回而數年中閭閻之受病政事之叢脞因循玩愒尚忍言哉夫因人而誤缺與懸缺而待人地方之大患也 臣愚以為三年計典人才嚮用之機州縣中以卓異來者奉 旨俞允回任候陞此定例也竊意銓部之科條固當循例而辨 聖主之激勸不妨破格而

施人情一遇知己稍加拂拭猶意氣騰上不屑故常况躬逢堯舜膺茲上考果能及鋒而試有不感激思奮力圖報効者乎可否即於引見之時皇上擇其人堪表率不愧二千石者分發各省遇缺補用又恐其後先異轍或晚節之不終器小易盈或初心之頓負則莫如暫行委署果其治行卓絕才守兼優者多則二年少則一年題請實授於鼓舞人才之中寓慎重選擢之意或於民生吏治庶有濟乎至於六部司員有從州縣卓異者有行取推陞者其中不無可用之才俾以理繁治劇似為駕輕就熟使之畫諾分曹不過輪班逐隊向年曾奉特旨於此等人員內簡用知府欽遵在案可否勅下該部堂官秉公選擇其老成歷練品端才裕者或公保或各保咨送吏部帶領引見拔其可用者命往各省陸續補用

亦委署一二年另請實授臣不敢謂領郡之難必以此等為巨擘但曾經練習與未信而任不同甫被薦揚亦方新之氣可鼓參酌而行徐觀其效是否有當伏候聖裁

請停查屯田疏乾隆十一年

趙青藜

江西道監察御史臣趙青藜謹奏為請停查屯田照舊辦理以免滋擾事查屯田一項沿自前明以至於今其各衛所多有以年代久遠冊籍散失無從稽查者亦有冊籍僅存而陵谷變易坐落界址無可徵實者有軍逃地荒係民自開墾者亦有運丁貧乏將田典佃於民而展轉相售屢易其主者更有典佃之久民從而建造廬舍營治坟墓者是以順治十三年漕臣即請清田歸運而究未辦結非奉行不力勢不能也今部臣議令清田歸運意不過卹丁以濟漕耳臣竊以為現行津貼之例民出費以贍丁丁

得項以承運其於漕非不濟也法無容更議者就使清田歸運果有益於丁猶得病其累民謂朝廷赤子不應歧視况丁雖得田不能自耕南北輓運曠日持久勢必名佃布種收其租息與未贖之津貼同一得項承運不見其益也且該丁等素封有幾贖田之費勢必貸之富人朝得田而暮轉售數年以後又循故轍徒令丁之狡黠者藉以行其挾制詐騙而民失其業含冤赴訴訟庭將無虛日誠不如現在津貼之無礙於漕而軍民得以相安也乃部議之尤難行者謂船已減運不當仍給屯田是必取減運之田以予現運之丁而不知此日之減丁即當年之現運目下之現運又即他年之減丁効力於前備簽於後各有減歇各有現運輪流既周無不均平者安用官之勞勞於忽取忽與為也取與之間冊必更造案愈煩而緒愈難理恐軍

與軍亦不得相安也近蒙特恩截漕覺此項減運不在輪流之內未免稍優然以國家深恩人被其澤而運軍適逢其會稍沾優渥似不為過且每年減運丁數不少奪其屯將必致流離失所殊非矜卹之道仰荷皇上如天之仁各丁經費俱屬有餘現在條例已為周詳但飭各督撫諭令縣衛等官清津貼之冊嚴典賣之禁而軍民固已相安漕運可永無誤夫利不十不變法故臣愚以為不若照舊辦理為便

請仍耗羨歸公疏乾隆十一年

趙青藜

江西道監察御史臣趙青藜謹奏為遵旨議奏事臣查耗羨一項行之自昔未嘗無其實沿之至今正不必辭其名臣伏見我聖祖仁皇帝臨御六十餘年民人樂業上下相安乃當日所為耗羨者官吏不以顯白朝

廷 朝廷亦不以苛核官吏第不令貪夫分外誅求即民情帖然允協間有一介不苟之士矯矯然並此不取此康熙年間無耗羨有清官之說所由來但利之所在其弊滋多誠如 聖明洞鑒所云上司苛索京官勒助因而借名樂輸按畝科派者往往而有我 世宗憲皇帝悉知其弊舉耗羨一項輕其額而歸之公俾有司不得濫取以病民上官不得苛求以病吏養廉有資公費有資條分縷折光明正大固補救之權宜實弛張之善道也我 皇上恐或不便於官民是用疇咨博採期折衷於至當臣竊意 皇上之所以殷殷致詢者必有不欲終安於歸公也耗羨不歸公則歸之民與歸之官二說而已為歸民之說者於義甚正於利甚溥而於時則有所未暇於勢則有所難行蓋 國家之經費有常各官之養廉安給 臣願

皇上時存此意以徐俟之豫大豐亨之後無遽責成效於目前也為歸官之說者謂以公濟公使上之人多此一佈置何如以私還私使官吏自為之通融此亦足動 明主之聽矣然臣不知其所通融者將仍舊額而操之自督撫乎果爾則取之民者如故也與歸公何異豈歸公為加賦而此遂不為加賦乎其不可一也則且泯其額以聽之徵收之縣令乎泯其額誠不為加賦而聽之州縣其果以何為貪以何為廉將必有肆無厭之求以剝吾民者其不可二也且歸之州縣即為州縣之私索遇有地方公務必且按畝科派封疆大吏亦心知其不合而徐原之甚至上下相蒙莫能究詰其不可三也且議歸州縣則必議復上司之規禮復上司之規禮而一取一與即為逢迎瞻徇之媒彼藉端以苛索者更無論矣其不可四也 臣查耗羨

視正稅為等差今使各州縣私其耗羨則正額多者俯仰有餘正額少者且展轉維艱同一牧民而相懸不啻霄壤政之不平莫甚於此其不可五也然則歸民則格於時勢歸官則有不可者五故臣愚以為照舊歸公便如以辦公不足至動正帑斷以損益之義臣固知我皇上之必不少為靳惜也近者江省連歉蠲賑並施故公項微有不足臣計歉後必獲豐登正供充盈耗羨隨裕核算藩庫果有盈餘請照雍正十一年河南山東二省量免正稅撥補還項則上無虧於國計下有裨於民生矣至官吏養廉在始定諸臣過於矜慎誠有不敷請仿漢制賜金以勸循良則鼓舞其志氣而黽勉熙績且優卹其私屬而額手稱便此所謂衷多益寡寬一分則受一分之賜者也外此而創勸輸之說立議敘之條取富民以養窮民意非不善正恐

挾餘貨者得議敘而一旦與朝命同其榮將益以動其相耀之心倍珍其居奇之術緩急不以相濟有無不以相通鄉里之推讓之風宗族無親睦之誼又其甚者父子異居兄弟鬩牆雖以骨月至戚臨勢利而輒變實積為風俗人心之隱憂臣尤願皇上慎之無輕易變更也議者或謂此項不除積欠之後必視為正稅而耗羨外又另生耗羨然臣謂既存其耗羨之名自不得求多於正額之外豈畫一之規模反得以肆其巧而無藝之徵斂竟莫以售其奸此尤不待辯而知其說之非矣臣是以再四思維終無以易於歸公之舊也

請嚴書役營私疏 乾隆十一年

歐堪善

江南道監察御史臣歐堪善謹奏為請嚴六部書役貪黷營私之習以昭憲典事竊惟各部書役之設不過奉行

文書抄承稿案並不許舞文弄法作奸犯科律有明條
世宗憲皇帝特嚴缺主案公之禁三年役滿回籍不許
留頓京師 皇上御極之初又申嚴各衙門吏役犯贓
即在十兩以下苛逼入己者亦擬重罪煌煌 功令何等
森嚴乃日久弊生牢不可破 臣查邇來吏役之犯贓敗露
者如陝西長安縣知縣楊毓芳等營陞知州一案書辦方
熊占等與之講究則賄賂公行矣又魯傳異等盜用吏員
執照賣售並私雕堂印一案則誑騙行私矣近今浙江營
兵為盜一案兵刑二部書吏之受賍舞弊者現交江蘇學
政崔紀布政使安寧審理矣 臣又風聞六部衙門惟兵吏
戶工書吏最為弊藪如職方司掌管武員銓選軍政陞降
處分各項蠹書黃緣為奸黠吏操縱在手凡叅將以下卓
異調用以及俸滿並軍功千總等員來京引 見未曾

到部先謁經承每員必勒索多金稍不遂意則百計推延
多方提駁將弁忍氣吞聲傾囊倒篋必飽其慾而後止故
京師相語云做得兵部侍郎不及職方承行由此以觀其
饕餮之風概可知也若乃吏部之赴選有規起用有費考
察有儀戶部之奏銷錢糧外官之解餉投批關稅之羨餘
私禮工部之題報工程核減奏銷各項種種弊竇積習相
沿視為恒產按其罪犯難以枚舉揆之各部大率類然若
輩巧計千般營私自利舞弄刀筆吹索癩毛假經承之權
外以脅官弁張衙門之勢下以肉小民有擇肥而噬之心
無守法奉公之義 輦轂之下豈容此輩魍魎叢比為奸
臣愚以為約束書吏莫先責成堂司堂司者一部之統率
而書吏之稟承也合無仰懇 皇上嚴飭各部堂司官
整頓精神留心檢察存非種必除之心凜去惡務盡之意

一應謁選引 見文武官員先行曉諭禁止私通書吏
一應公文當堂投遞不得先交書辦如有需索行賄暗地
交往者官則從重處分吏則按律究擬庶紀綱整肅而吏
弊澄清矣

請勅會議諸臣共期平允疏乾隆十一年朱績經

協理陝西道事福建道試監察御史臣朱績經謹奏為
敬陳管見仰祈 睿鑒事臣伏見我 皇上親攬萬
機虛衷集益凡有會議事件並許諸臣各抒所見以備採
擇凡在臣工自當仰體 聖心和衷辦理不可隨聲附
和依違遷就亦不可固執己見曲護前非臣嘗上稽唐虞
之世曰都曰兪曰吁曰咈共襄至治是以政體之隆後世
無加臣昔備員中書繕寫票簽見各部院題本間有兩議
具奏者大學士擬雙簽進 呈或依前議或依後議均候

聖旨裁定此誠執兩用中之要道 聖朝政體所

以媲美唐虞也近見法司衙門會核之案有兩議並陳者
主稿衙門或另備夾片申明前議之是指駁後議之非在
該衙門誠以所見既確不妨再為申說然臣謂兩議進

呈其是非可否已難逃於 睿鑒我 皇上權衡不

爽必不因夾片之申說而獨從其請是以奉 旨之後

羣情悅服但主稿衙門獨得自申其說其蹟既涉爭競而
臣猶恐相沿為例將辦事諸臣稍存私見明知後議並陳
相形見絀因用夾片極力詆排文飾已短其有關於政體
實非淺鮮臣竊思主稿之臣所見果已確切何妨即以夾
片所陳再同在議諸臣平心陳說逐一商確在異議者亦
當心折或往復論議其言果有可採主稿者亦當屈己聽
從總共期於平允而不必存獨是之見昔宋臣程顥與吳

師禮談王安石學問錯處曰為我盡達于介甫我亦未敢自以為是如有說願往復此天下公理無彼我果能明辯不有益於介甫必有益於我臣竊謂宋室諸臣純正和平莫如程顥雖以王安石之拗執聞其論事往往心服此正諸臣之所宜是則是傲也臣請自今會議之案間有異同務於進本之前各盡己說平心商榷彼此不存獨是之見以共期於平允倘必不能畫一則兩議並陳靜候 聖裁不得另加夾片豫為申說庶可泯爭競之迹杜營私之漸則都俞吁咈盡屬和衷益見 聖治之隆與唐虞繼美矣

請刊布文告疏 乾隆十一年

曹秀先

浙江道監察御史臣曹秀先謹 奏為敬抒愚悃仰祈 睿鑒事欽惟我 皇上執中圖治至敬至誠識為君

之獨難每遇災而思懼茲因本月十二日戌時地覺微動降詔求言大哉此好問好察之風也臣雖庸愚敢不竭誠以對考古來載地震者多矣占驗之術不一其事亦或應或不應有未可膠柱論者臣思地體屬陰象卑下宜靜不宜動今日之動度亦卑下不循分義戾氣所感未可知也即如百姓戕其牧令兵卒訐其將弁奴謀其家長弟虐其胞兄下屬挾上官以短長輿隸辱士夫於道路凡有不忍聞不忍言者皆屬傷風敗俗敦棄彝倫之事其在史冊所書何代無之要不宜有於今日也我 皇上敦重倫紀愛兵恤民何等周詳懇摯而人心風俗澆淳散樸耳聞目見有此異事固緣疆宇遼遠人心難齊抑亦文告之詞不修而教化有未廣也論教化之事必先以養今之養民若興水利種樹木蠲糧賦卹饑荒次第舉行信云善矣

而所謂教化者則非近日城設一學村設一塾以課凡民之俊秀也惟期窮鄉僻壤愚樸小民共明共曉故莫若文告之詞其在 國家體制則為 詔諭其在官長事宜則為告示今直省布貼勸民告示多向通衢大道徒飾耳目詞文而幅廣紙費而理蒙巧慧之民人畧識之而愚樸者不識也而窮鄉僻壤且不得一見也 臣愚以為守土官吏所得自主者如勸民忠信孝弟禮義廉恥扶尊抑卑正名定分等事演成歌詞俾愚民易曉文理仍敬遵 聖諭十六條題目並擇其輕重緩急四時輪流布貼村墟無遺無漏久之而民將觀感興起也或謂必須守土官吏躬親教導者夫親民之吏莫如州縣州縣將時下鄉而教其民於情於勢斷有未能今欲令州縣時教其民或一月限一次一次至一鄉亦自可行凡州縣各有佐貳特不許其

擅理民詞至於徵追比較原可代辦州縣者此煩文得以餘閒下鄉教導矣若令佐貳前行教導體制不尊呼應不靈小民聚觀且有譁然而笑者故必須州縣親往也不得已而教職偶一代之貢監生童氣類相感為之領袖其說尚可行也上年蒙 皇上特准御史所請直省刊布小民易知律例 臣謂刊布律例者道之以政齊之以刑急則治其標也若刊布 詔諭告示州縣親行教導者道之以德齊之以禮緩則治其本也當此人心風俗急宜洗滌之時治其標而不知所畏治其本而不知所勸日積月累仁漸義摩則前此所云傷風敗俗敦棄彝倫之事漸少漸無戾氣日消和氣日聚卑下安分六字又寧定足慰我 皇上乾惕之心於萬一耳 臣學不通經才不濟務輒恃我 皇上韜鐸之誠用獻芻蕘是否有當伏祈 聖明採

我 皇上陳之

一勸農桑以警游惰也農桑為生民衣食之原地土雖有肥磽民勤則田疇闢而地利日生民情則荒蕪多而地力亦絀鳳穎一帶臣於上年徧歷查看時當冬月水退之後二麥雖已播種而人工不知耨耩培壅收穫焉得不薄所過村莊大率樹木甚稀蔬圃亦少男婦袖手者多鮮勤耕作豐稔則仰食於天災歉則待給於官習為固然官斯土者一遇災荒則終年查辦奔走不遑過此則專事簿書錢穀無誤期會視勸導農功為不急之務人情好逸惡勞苟非地方官親履田畔朝督夕課何由化惰窳之習為久遠之圖臣既於巡行之際諄諭各守令復將歷年 諭旨勸課各條敬謹摘錄剴切行知各州縣於散賑之時鄉民赴廠領賑即一一曉諭並令巡查村落隨地體察教督或

藝桑麻或植蔬菜審地土之所宜凡可以佐小民口食之需柴薪之用勸令試種勤者獎之不率者戒之寓教於養使之儆慕仍責成道府於盤查巡行之便時為查驗督勸臣再密委委員分路閱視有無成效一望而知俟一年之後就各州縣中即以民情之勤惰為勸課之優劣果有實心愛民成效已著者容 臣核實奏 聞請 旨嘉獎 怠忽膜視者叅處以勵羣吏庶農功勤而治效可漸期矣 一疏挑溝洫以備旱潦也田間溝塘係水利田功之要務地勢雖有高下而坡塘有蓄堤堰有防即小有水旱可收灌溉宣洩之益查鳳穎泗一切水利經督臣河臣審度全局相機籌辦其挑挖支河疏濬溝洫並修築圩塘開壩涵洞於乾隆五年經 欽差水利大臣汪隆等通行勘定分別各工緩急辦理在案第 臣巡行時耳目所及詢訪所

知尚有一州一邑之中方隅水利應行疏挑者按鳳穎一帶其地有三等一為岡地最高一為湖地稍低一為灣地最下灣地接連大河水發時一片洪流難施人力至湖地則外高中低積潦聚而為湖如於下流濬為渠使有洩瀉即可涸出栽種非果盡成棄地乃民愚不知經畫地方官又以連歲災祲民濬無力動帑繁多而止其最高之岡地水災不及而絕少溝池若交秋缺雨即苦曠乾間有傍山麓為陂塘蓄水灌田者如壽州安豐塘傳為春秋時楚相孫叔敖所築灌溉萬頃田疇歷久淤塞先經 欽差水利大臣汪澂等查勘時值水過沙停議請招民間墾經部議覆行令確查妥議嗣又委員確勘塘身蓄水之處尚有一百二十餘里民田賴以灌溉其利甚溥復議修築尚未舉行又懷遠縣之郭陂塘鳳陽縣之六塘可溉田數十百

頃亦經勘議列入緩工臣查此一州二縣陂塘關係民田工費亦不甚繁似應及時修築其餘因地制宜開溝築堰以為蓄洩者尚多地方官因時勸導未始不可漸次興舉臣愚竊計上年水災賑用撥米留漕之外動帑一百餘萬兩若平時酌動數萬金陸續修築並勸民疏導就一鄉一村一州一邑之水利規畫經理則民間減一分之荒歉即多一分之收成 朝廷省一分之帑金曲突徙薪誠屬至計似宜未雨綢繆因時調劑臣現在諄飭牧令先將民間可興之工勤加相度傳集里民計議如踴躍樂從聽其農隙興舉官為督察工竣獎賞其有工鉅費繁數至千百兩以上民力不能辦者可否容臣乘此停徵一年有司公務稍暇令其在境內悉心查勘確估核實咨 題俟經費充裕之日動帑修濬倘遇偏災即備以工代賑一舉兩得其

有急應修舉之工臣仍妥酌會商督臣奏請辦理早收水利實效亦目前補救之一策也

一稽核流移以正風俗也鳳潁民風樂於轉徙在豐稔之年秋收事畢二麥已種即挈眷外出至春熟方歸歉歲尤不能無特是資送之典原為卹災而設要必實在災民素係力穡之人定例分晰詳明乃愚民無知以異地之養贍資給為可利遇有災歉一俟地方官勘過與之賑票即量留一二人在家領賑餘仍潛往隣境希圖資給口糧俗言相傳在家領賑者為大糧在外留養者為小糧沿途資送者為行糧至有一家而領三糧者我皇上至仁如天保民若赤災民藉此得以生全原不忍再為區別第愚民以流移轉徙為得計愈致本業拋荒人無固志且有向係出外趁食之人一聞本籍災歉即捏稱災民濫邀資給而

地方官之辦理近年亦偏於姑息凡遇外來流民不加區別概與資送即小有生事亦從寬不究惟送令出境幸免無事狡黠之徒窺見情勢遂致携羣挈黨多索口糧船隻或至僻遠鄉村強乞硬索臣稔知滋擾不法流弊於上年報災之時示檄申禁約束並會同督臣酌定資送規條通飭遵辦刁民稍知斂戢但地方水旱偏災時所恒有刁風滋長所關匪細臣愚竊以地方辦理災務宜使安靜守法况沿途流民奸匪混雜豈可姑縱長奸此等刁民强悍兇頑多非孱弱無難辨識地方官自宜留心查察實在災民方與資送如捏稱災民生事強抗者立即究處押解原籍約束盜竊不法者審實通詳究擬即災民中有頑悍生事者亦與究懲庶人人於皇恩浩蕩之中仍凜然知國法之不可犯以仰副皇上仁育義正之盛心於地

方均有裨益仍令有司於查勘給發賬票之先預行剴切曉諭在籍領賬力勤耕作不許外出復希資給口糧察出扣賬禁於未然或既轉徙出境再出外營生趁食及游惰無業之民情形踪跡與力田災民迥別察驗立明今隣省辦理尚未盡一有將彈唱磨鏡謀生貧民咨送回籍者或將豐稔地方之貧民咨送回籍者均未照例查辦又資送人數應陸續分送向例每起五十名似覺為數尚多應請人至三十名口即作一起資送以免聚集生事並不許沿途逗遛前後至二三百口同日到境庶為妥協而於地方亦得肅清矣

請禁囤當米穀疏 乾隆十二年

湯聘

陝西道監察御史臣湯聘謹 奏為請嚴囤當米穀之禁以充民食事竊思布帛菽粟生民之命也一歲之收為一

歲之用則民食尚不至於甚艱一歲之收為數家之積則民食乃必至於日困查直隸河南山東山西陝西等省民間多產二麥及黍稷雜糧等項其餘各省則皆播種稻米全賴秋成豐稔米價低平窮民易謀升斗即遇歉歲商販流通小民亦可免粒米如珠之患從前各省產米地方向有富戶所收稻穀囤積經年非遇價昂堅不出糶然此猶一邑之中不過以一己之收為一家之積為害尚未甚大近聞民間典當竟有收當米穀一事子息甚輕招來甚衆囤積甚多在典商不過多中射利而奸商刁販遂恃有典鋪通融無不乘賤收買即如一人僅有本銀千兩買收米穀若干石隨向典鋪質銀七八百兩飛即又買米穀又質銀五六百兩不等隨收隨典輾轉翻騰約計一分本銀非買至四五分銀數之米穀不止迨至來春及夏末秋初青

黃不接米價勢必昂貴伊等收明子母陸續取贖陸續出糶是以小民一歲之收始則賤價歸商終乃貴價歸民典商囤戶坐享厚利而小民並受其困矣此囤當米穀之為害甚烈也我皇上軫念民間衣食宵旰靡寧而於採買積貯一事屢屢宸衷各省大吏亦屢經籌畫豈期民間典鋪狼狽作奸止知利己不知病民若不嚴行禁絕正恐歲登大有不免食貴之虞且他省風聞難免效尤之舉蓋囤當之弊江浙尤甚而囤當之物並不獨米穀也每年遇蠶絲告成及秋底棉花成熟此等商戶一如收當米穀之法恣膽張羅竟似小民衣食之計止以供奸商網利之圖其有關於百姓生計者豈淺鮮哉目下正屆秋麥將登新絲將出之候仰祈皇上勅諭直省督撫嚴飭州縣有司無論城鄉典鋪如有囤積米穀等貨尚未糶賣者

諭令首出照值官為收買免其懲治倘敢隱匿不報一經發覺即照違制律嚴行治罪並嗣後每季取具各典鋪並無囤當米穀等項遵依甘結存案有再犯者治罪如律如此庶米穀漸得流通生計漸可充裕窮簷蔭屋不無少補於萬一也

請減穀價並興水利疏 乾隆十二年 趙青藜

江西道監察御史臣趙青藜謹 奏為請減穀價並興西北水利事臣伏見我皇上軫念民依以所在穀價昂貴再三求審盈絀之理裕流通之源 特頒諭旨令暫停隣省採買及捐監收米之例酌緩急而藏富於民即此已足登一世於春臺猶且 淵衷若谷着大學士會同九卿詳議速奏開誠布公集思廣益真生民之福也而臣竊深為今日情形穀價之貴實由漸積使然耳蓋其驟貴

也或因歲歉或因採買而及其採買既過歉歲復熟穀價非不稍減然以視從前未貴時之原價固已畧浮其值矣如此經三五次起落三五次浮積而視原價固已大相懸絕矣日貴一日年貴一年習以為常誰肯率先以減者况現在官糶定例適足為商賈居奇之藉查定例大荒減價一錢中荒五分尋常出易即不准減此無論商屯把持胥役需索而庫平庫色民不勝其誅求也造冊給票照票給米民不勝其守候也任發任領以官為政米之良否民不得而揀擇也又糶米之數人不得過五斗即以極減之一錢計之為銀不過五分此五分者足敵其誅求乎足償其守候乎民無所利觀望不前而官欲速其售商乃得通胥役以巧行其屯穀之昂貴愈成一牢不可破之局奉行之不善所當急議通變者此也臣愚以為宜酌改定例不妨

多減以創率先之路破積貴之局而議者必曰徒以利奸屯也不知減價既多則民之趨買者必衆趨既衆則其自為稽察者必嚴商屯必無所容其掩飾而受國家浩蕩之澤者莫非待哺之民矣乃議者或曰減多糶多如缺倉額何而臣愚以為減糶而價平價平而糶穀之項即可就本地秋收時買補不憂其缺也抑臣更有請者臣查雍正年間直隸營田水利每歲穀入不下數十萬石比年以來幾成故事且有漸就廢弛者以致穀入多不如前臣甚惜之臣請諭令直隸督臣查明從前營田處所就現在已成田畝造一清冊從長經理並詳查妥議應修復者修復應興舉者興舉總以屬之州縣及統轄之道府分別勸懲無喜事無畏難寬為之期而務收實效焉雖水利事宜非臣之明所能詳悉而營成一處得一處之益營成一畝

亦得一畝之益考禹貢揚州之域田惟下下荊州之域田惟下中今所稱產米鄉者乃在湖廣江西二省是寧非西北之水失其道而地失其利之明驗乎且西北佃田廣種薄收人以頃計所以然者以水潦難齊而工本恐棄於無用也誠興水利以善蓄洩使旱乾水溢不得為災則深耕易耨而佃人且以畝計至多亦以畝之十計是一頃之地可多容六七佃戶失業之民可漸驅以歸於農而游手者寡矣再查直隸一省旗民居多若任業主以董莊頭任莊頭以率散佃其為力尤易而為法尤簡至於大工力難責之民人者令地方官詳明督撫估計請帑興修以所入租穀按畝按年扣還第恐畏難而奉行不實耳古來大工大役多以行所無事而成以本地官勸本地民興本地水利即有會同之處而以效役之民視之猶其本地父母不

患不聽故臣以為屬之州縣及統轄之道府而已足也至一切規畫營田定例應有可遵特其多差官役往來道路則臣所謂喜事之適以滋擾而大不可者也臣請皇上廣集衆議斷自宸衷一意舉行縱無近功之可圖實為萬世所利賴蓋水滋灌溉而土壤膏沃穀入豐盈久之即東南輓運可省何至穀價昂貴上煩聖慮若止暫停隣省採買收捐監穀保無穀不加貴足矣欲減價就平臣有以知其不能微特臣而已即定議之大臣恐亦不能保其必減也何者積漸之勢已成難可卒返耳夫豈我皇上疇咨博詢之意哉且監穀既停將來遇有需穀之處仍向隣近採買價必加昂而旋停旋買抑豈我皇上從長妥計之諭旨哉蓋理財足民無過開源節流之道而增糶減糶依然良法美意之初雖減價以糶御

史李清芳曾以 上請羣臣業經議駁而第以官糶不減則穀價終不得而平價不平則終無以仰慰 宵旰之憂勤又何敢以駁議僉同遂為緘默不披瀝愚忱於 聖明之前也

籌民食疏 乾隆十三年

楊錫紱

湖北巡撫臣楊錫紱謹 奏為遵 旨議奏事竊臣欽奉 上諭以軍機大臣等議覆西安巡撫徐杞所奏民間糧價 特命詳覈具覆臣跪讀之下仰見 聖主念切民天熟籌足食之至意臣忝任封疆敢不實意體察講求得失用仰副 勤求民隱之 聖心臣伏查水旱偏災與囤戶居奇雖亦足致米穀之貴然尚非所貴由之源也臣竊以為米穀之貴由於買食者多買食之多由於民貧夫 國家休養生息百餘年於茲荒土盡闢宜乎

民之日富而反貧者積漸之勢也所謂積漸之勢有四一曰戶口繁滋一曰風俗日奢一曰田歸富戶一曰倉穀採買倉穀採買之弊我 皇上所謂處處積貯年年採買民間所出半入倉庾未免致妨民食蓋已 洞悉情形毋庸更贅戶口繁滋則今日海宇實在情形 聖諭謂自康熙年間以來休養生息便應逐漸加增何至一時頓長以臣觀之實亦未嘗不係漸增臣生長鄉村世勤耕作見康熙年間稻穀登場之時每石不過二三錢雍正年間則需四五錢無復二三錢之價今則必需五六錢無復三四錢之價蓋戶口多則需穀亦多雖數十年以來荒土未嘗不加墾闢然至今而無可墾之荒者多矣則戶口繁滋是以致米價之貴逐漸加增勢必然也臣謂由於風俗日奢者蓋 國初人經亂離備嘗艱苦風尚儉樸迨安居樂

業數十年後子弟有笑其祖父之樸陋者矣衣食之類競求佳麗婚喪之事務期美觀始於通都大邑今則荒徼山僻之農民亦漸習奢靡平時拮据為常力田所入抵債去其大半餘又隨手花銷甫交冬春即需糶米而食豐年口食亦取給市鋪則價焉得不加增也臣謂由於田歸富戶者國初地餘於人則地價賤承平以後地足養人則地價平承平既久人餘於地則地價貴向日每畝一二兩貧而後賣既賣無力復買富而後買已買可不復賣近日田之歸於富戶者大約十之五六舊時有田之人今俱為佃耕之莊每歲所入難敷一家口食必須買米接濟而富莊登場之後非得貴價莫肯輕售實操糧價低昂之權夫一物也一人市之價不能增也十人市之則一時頓長矣十人出售價不能求多也一人專售則任其高勒矣如是而

米穀安得不貴乎就四者之由合而計之生齒之繁此國家登斯民於仁壽之效也田歸富莊非均田不可然此法行之開創之初尚虞紛擾今累代承平之時更難施行惟風俗奢靡尚屬勸禁可施或婚喪往來示以一定之閑或衣服器具限以莫踰之制現奉 欽定禮書頒發飭遵應令地方官實力董率酌示勸懲自紳士而及齊民自城鎮而及鄉僻以次釐滌風或稍斂但人情由儉入奢易由奢返儉難此止可徐徐化導不能遽收其效至於常平積貯藉以備荒難議停止 聖明遠見誠為採本握要然臣再四思維雖不便因採買致貴議停而其中亦尚有應斟酌調劑者蓋積貯以足敷賑濟而止不必過多乾隆九年御史孫灝奏請酌定常平貯穀額數以平米價經部議准通行各省雖俱酌定額數然當時督撫究為有備無

患之意重而未暇計及穀價之日昂採買維艱即以湖南言之州縣之倉有貯至五六萬者府倉有貯至七八萬者亦未免過多應飭各省將定額再加詳細確核有過多者酌量裁減十之一二其已買足者於平糶時存銀歸庫未買足者即不必再買又從前部議各省倉穀足額後續有收捐監穀設遇賑恤動用毋庸買補第賑恤已有額貯之穀此額外捐穀與其久貯煩重不如逐歲賣之湖南現在將額外捐穀每歲糶價解司為修理城垣之用他省似亦可以照行又常平糶三為出陳易新計耳其實豐年之後原無資於平糶而倉穀堅好亦有存貯數年者州縣官因年例糶三即穀好年豐亦必出糶請嗣後不必限定每年糶三過年歉價貴之時多糶固可如年豐價平之時即不糶亦可蓋多糶一石小民未必受一石之益而少買一石

閭閻即受少買一石之惠又臣伏讀

諭旨詢及今日

政治之闕失何在所以致此者何由仰見

聖德謙沖

治益求治誠天下生民之福也臣反覆思之今日政治大綱細目無不畢舉第奉行之下致力不專循名者多而盡實者少即如定例令州縣官徧歷鄉村體訪應興應禁各事將行之有無效驗造冊詳報督撫核實三年一次奏

聞此固責實之意然查所列應興諸政皆易於鋪張假

冒之事其有實跡可據而難於粉飾者莫如地方之水利顧因泛濫之事多而水利亦遂致力不專未奏實效臣竊以為目今養民之政尤當專意講求者莫如水利一事似應酌立勸懲之法使各認真料理免托空言蓋近日荒土雖已盡闢而水利尚未盡興夫雨暘偶愆事所常有賴水利之蓄洩有資自非異常水旱豈即坐視無收今湖南河

港之水利其在通都孔道固已逐一整頓然山鄉僻壤之間舊有陂塘堰壩歷久漫廢者不少又一鄉一隅水泉隔遠塘井不足雖可疏引開濬而地屬有主倡率無人遂多因循者亦不一而足大約民間百畝之田有一二畝陂塘即可救護而愚民昧於遠計寧爭此一二畝歲收之穀不知偶值少雨並百畝而棄之若親民之官為之指示開導當無不憬然悟者臣請 勅下直省責成道府等官督率州縣專力於水利務必實心講求稽之誌乘訪之紳耆凡遇下鄉之便即留意相度何處舊跡之宜復何處新工之宜興面同該地士庶熟籌詳議或勸其協力或代其設法或量捐廉俸以為倡或酌請公項以為助果有實意感孚於民誰不踴躍從事風聲所樹即身未親歷之處一切水利民間亦必自為興復則土盡膏腴出穀可倍於舊蓄

洩有備偏災不能為患庶於米穀之貴不無裨益此等陂塘堰壩之新復新興俱有實跡可以勘查道府勘驗確實果於民田有益詳請 題咨酌與議敘其有平日漫不經心以致旱澇得以為災亦令道府於勘災之際查有未興水利州縣明知不理者即詳揭參處如此可使州縣專力講求於應興諸政中尤加意料理未必非補救米貴之一道也夫米價之貴今日已成積漸之勢欲令一旦復歸於賤誠未易言就臣所見不過於採買之中斟酌調劑並請專力水利以期產穀之多是否有當伏惟 聖明裁擇

陳湖北水道情形疏 乾隆十三年

彭樹葵

湖北巡撫臣彭樹葵謹 奏為敬陳查明水道情形仰祈

睿鑒事竊臣於二月內抵任後接讀 諭旨將湖

河灘地禁止侵佔一案作何辦理之處查明具奏隨經檢

查舊案以楚省積水之區俱係納有糧課並非官湖可容
侵佔至湖邊江岸隙地私築小坑厯係嚴行禁止等因聲
明覆奏在案半載以來臣時時留心體察兼採輿論乃知
其間仍有尚須籌畫者蓋少一阻水之處即多一容水之
區則私坑之禁尤不可不既乎其實也查荆襄一帶江湖
袤延千有餘里一遇異漲必藉餘地以資容納考之宋孟
洪知江陵時曾修三海八櫃以設險而潑水後豪右據以
為田汪葉力復之又荊州舊有九穴十三口以疏江流會
漢水是昔之策水利者大都不越以地予水之說也自滄
桑變易故迹久湮現在大江南岸止有虎渡調絃黃金等
口分疏江水南入洞庭當汛漲時稍殺其勢至漢水由大
澤口分派入荆夏秋汛漲又上承荆門當陽諸山之水匯
入長湖下達潛監瀾漫無際所恃以為蓄洩者譬諸一人

之身江邑之長湖桑湖紅馬白鷺等湖胸膈也潛監沔陽
諸湖下達沌口尾閘也其間滌洄盤折之支河港汊則四
肢血脈也胸膈欲其寬尾閘欲其通四肢欲其周流無滯
無如三襄之水性濁多沙最易淤積有力者因之趨利如
鶩始則於岸脚湖心多方截流以成淤繼則借水糧魚課
四圍築堤以成坑在小民計圖謀生惟恐不廣而不知人
與水爭地為利水必與人爭地為殃川壅而潰蓋有自矣
臣伏查舊案節據荆宜施道屠嘉正安襄鄖道王槩議將
未有之坑永禁私築已潰之坑不許修復詳請飭遵補偏
救敝誠為允當惟是利之所在民間每不憚百計以求勝
而地方有司未能規及遠大少不留意則私築之弊仍有
不能免者縱令道府親查而曾否加添究屬無憑臣再四
熟籌竊以為積習既成挽回非易今欲復三海八櫃之舊

勢誠不能亦祇杜其將來而不使坑之增多則當先查其現有而確知坑之定數現在惟有檄飭各該州縣於冬春之際親行履勘將闔邑所有現坑若干各依土名查清造冊由府核定賚送各衙門存案嗣後即以此次所查著為定數聽民安業此外永遠不許私自加增即一坑之內亦不得再為擴充仍令該管道員於本年出巡之便逐細詳查加結具報則有無增添按冊可稽而各州縣之實心奉行與否亦可藉以查核勸懲至此後遇有淤灘原係民間納糧之地或種麥豆或取柴草均聽自便但不得另築坑塍以妨水路如此則愚民不致因小失大地方有司亦不敢姑息怠玩自貽叅處而與水爭地之錮習或可少息矣

皇清奏議卷四十五

皇清奏議卷四十六

請精選實學博求遺編疏 乾隆十五年王應綵

掌湖廣道監察御史臣王應綵謹 奏為通經之選宜精

祕府之儲宜備請博採著述以覘績學以收宿儒事伏

讀 上諭崇尚經術良有關於世道人心令內外大臣

公舉所知以應精選復奉 諭旨內外所舉人員大學

士九卿再行核定請旨親加臨試典至鉅也顧臣於經學

昌明之會竊不勝有防微杜漸之思焉自漢唐以來說理

之醇者固足為聖教之羽翼其駁者反足為正道之榛蕪

今諸經既奉 列聖欽定三禮又仰稟 聖裁其於

前代之說固已棄偽而存真取精而遺粗矣夫大義微言

豈謂遂無餘蘊而著述之家往往薄正論為無奇喜新說

之動聽倡為異議迷誤後學則怪僻之為害也又有自撰

偽書假名前哲通儒雖識其妄初學易受其愚則詐偽之為害也臣請凡應選之士已著有成書者在外各送所司在內賚投禮部轉呈御覽勅下儒臣詳加審正大抵淺深雖視乎其人而邪正必先嚴其別其有如怪僻作偽等害者請皆罷之其精純無疵者乞皇上一體親加臨試夫先為區別以核定其平時之著述復詳加考試以歷驗其條對之淹通而後實學出使天下耳目一軌於正蓋舉之之途宜廣凡立說著書者皆可上聞而擇之之方又不可不慎誠使人知經學關係乎人心風俗者重不徒以一日之長俸而獲選也抑臣更有請者我朝經學之盛前代罕有其能致身通顯以經學裨益聖治者固有其人而閉戶潛修皓首披吟獨抱遺經自甘樸學者人往而書始出歲久而學乃傳曾不得與今日應

選之士同邀榮遇凡若斯者可為深惜昔漢唐之世建藏書之策置寫書之官分遣使臣博求遺編或給以筆札繕本進呈或被之殊榮旌其身後皆炳著於史冊艷稱於士林今祕府藏書固已跨越漢唐而草茅下士沐浴聖化豈無積策遺留仰懇天恩勅下內外大臣細加搜訪上其遺書如果能斟酌羣言闡明奧旨伏乞勅下部議量予旌獎其書藏諸祕府允為績學之勸而國史藝文所載亦視前代而益光矣至現在經生中或有年老癯病不能就道者亦令一例舉出但於摺內聲明並上其所著之書看詳審奪如此則採納宏而遴選精必有實學宿儒上副旁求盛典者矣

請倣太學成規以廣教法疏乾隆十五年葛德潤
提督福建學政監察御史臣葛德潤謹奏為敬倣太學

成規推廣教法以課實效以育真才事竊惟制科取士原欲使士子通經術明治道為國家有用之材非徒為弋獲功名之具也今鄉會校士以經書觀其體以策論表判覘其用即學臣考試童生書文之外必兼經義而生員科考則兼策童生招覆則兼論與鄉會畧同法綦備矣然上求之以實下應之以名士子安陋就簡不但古學時務多不究心即所習本經亦往往有勦襲剽竊之弊雖其間不無通經績學者而欲其真才輩出足備朝廷器使之選尚未逮也顧欲取之不窮必先養之有素今學校條教月有課季有考府州縣學官非不按期舉行而諸生散處四鄉遠近不一臨期不能盡到其所到者除課試八股外於今古之學概未之及所以歲科兩試其生童四書文尚有可觀至經義策問求其洞徹源委者百無一二則鄉會取士

安所得通今博古之人而多為選哉此非教之無其法實教之無其人也縱有聰明穎異之士競趨於揣摩掇取之途勉循故事希圖倖獲而不能沉潛討論以崇實學臣愚以為教育之道固在人與法尤必準乎人情審於時地迎其機而利導之斯教學日起而有功伏查前刑部尚書管國子監事臣孫嘉淦敬陳太學規條一疏請在監肄業各生倣宋胡瑗立經義治事之法於四書八股之外各明一經各治一事以課實學是太學之教業有成規而未通行直省似宜推廣其法以溥教澤然概令府州縣學照例舉行竊恐無能教官視為煩難勉強奉行終無實際臣思迫於督責者勉為從事其效難生於慕悅者樂為赴功其效易如各省設立書院誠造就人才之地我世宗憲皇帝因國子監設在京師道里遼遠四方不能胥會令各省

封疆大臣舉行書院興賢育才比古侯國之學又數

賜帑金以資膏火我

皇上加意作人振興士習疊奉

上諭令督撫學臣慎選師儒以董其事廣收俊秀用勵觀摩以故有志之士願負笈從學者率爭自奮勉惟恐擯棄弗錄每遇鄉會獲售者多近來直省大郡大邑官與紳士頗有捐資創立者此等地方膏火有資師儒有教又書籍完備可供誦覽臣請悉照原議太學成規而參酌之並立經義治事規條令在院肄業諸生各治一事俱註明總冊明經則以御纂折衷傳說為主治事則如歷代典禮賦役律令邊防水利天官河渠算法之類俱以三通為參考務窮源溯委識其中得失利弊仍令先治經後治事以專其力果能通明練達方許兼治他經他事不得愛博不專每人造立格冊一本將習過經書按依月日填寫

起止其所治之事亦將誦覽過某書中事蹟議論並令親填於冊或十日或半月送掌教稽察就中摘條發問使其條舉衆說斷以己意以考其勤惰虛實其在省會者原有督撫考察而在郡縣者即令郡縣官實力督課務令明經則精通經義治事則練達事情與四書文一體甲乙有器識浮淺及不率教者擯斥勿留有在外能通一經治一事而願藉師資者准其考試肄業至肄業諸生中果有材器尤異者在府州縣則申送省院在省會則仍照乾隆元年諭旨准予薦舉一二以示鼓勵如此則人心慕悅士切龜皇雖未必盡明體達用而講習有素其見於經義策論必能有所發明自無勦襲敷衍之弊况通經曉事所作制藝必益有精神光彩昔人稱四書文為經義非無謂也行之數年將見真材輩出器使得人視教官之勉強督率

洵事半而功倍矣抑臣更有請者學貴得師宜慎其選省城書院由督撫訪求其學行優者為掌教然其間去留亦所時有至郡邑書院未必盡得其人若僅取其善為時文而嘗得售於場屋者以充其選仍於教訓實學無益臣查現在內外保舉通經人員欽奉諭旨令大學士九卿臨時再加核實請旨引見將來臨軒考試一經睿鑒必多真才此項入選人員倘蒙聖恩有發往各省試用者即令督撫查明現在需人之書院即時遣送以資經義治事之教如果三年期滿著有成效許該督撫據實以應補之缺題請實授並聲明免其試用如或效雖未著而教術可觀仍酌量再留三年以觀後效則得人以任法而法以人行矣再制科以五經取士纂折衷傳說諸書既家絃戶誦矣現經修三禮告成合無

仰懇

皇上勅部將三禮成書

頒發直省令布政

司敬謹刊刻准人刷印並聽坊間翻刻廣布俾士子得以及時誦讀尤於學術有所裨益要之立德立功士固不以文藝為重然義理不明無由正己事故未諳何以治人果能通今博古則向上事業由此而進無難矣臣為育才起見欲推大學之法廣師儒之傳一切考課責成有整飭而無紛更其事似此難行其效似可有獲不揣愚昧敬抒一得伏乞睿鑒

請慎改律令疏乾隆十五年

熊學鵬

太僕寺卿臣熊學鵬謹奏為敬抒愚忱密請聖鑒事奉諭今春入夏以來京畿附近地方雨澤未能普遍深切憂勞乃者十七日望月食既雖春秋不書月食未為災異然垂象示儆惟應省愆修政以仰格天心

其令九卿科道等悉心體究或朕躬有闕或時政失宜據事直陳毋有隱諱仰見我 皇上敬 天求言省愆勤政乾惕靡寧之 聖意臣聞感格 天心惟應之以至實而維持治道必慎之於至微堯有九年之水湯有七年之旱水旱之災並不由堯湯所致然必堯湯而後成至聖者以其圖治未然咨傲自責固不待政事之有闕失早已炳燭幾先勤修體察用能轉災為福以迓天庥也欽惟我 朝定鼎以來百有餘年海宇乂安飲和食德自唐虞三代而後治道之隆未有倫比其所以致此者實由 列聖相承深仁厚澤久道化成 皇仁如天好生仁恩湛濺洵為前代帝王之所莫能企及惟是為政之道寬猛責乎相濟過寬則有廢弛之患過猛則有刻覈之傷二者各有流弊皆當先事預防以期政歸平允上年秋審勾

決較前數年覺多 臣體察案情如虧空人犯身為職官藐視憲典侵帑累公軍機獲罪之人僨事失律又如雲南省毋白舊案乃淫兇極惡之徒皆為法所莫貸此殺一人正以安衆人捧讀頒發 諭旨 宸衷愷惻原係辟以止辟何嘗有意從嚴乃 臣見近年臣工條奏更改刑名律例者大概多尚嚴厲在諸臣急思整頓雖不盡有成心然禮載刑平國用中典現在法度章程燦然明備但使守而勿替即不流於廢弛何不將法令漸改漸急浸至滋章有傷治道夫治道之賴維持也如人身身培養元氣當元氣充足之時偶因寒暑失節用一迅勵藥劑一時非不快然即有過當未見大害然暗中之傷損已多所以用藥止求當可而矯枉不宜過正仰賴 聖朝重熙累洽仁德覃敷酷吏不聞於世今若不預為節制設有治獄之吏不能仰

體 聖天子刑期無刑之心謬存以刻為明之念以為治道所繫專尚刑威或遇事生風或文致定罪迨至奏當之成縱蒙 聖明昭雪已不勝拖累於先况又覆盆不見日月者哉夫天地之大德曰生聖人之守位曰仁清理刑獄者乃祈求雨澤之方崇尚寬仁者實帝王經世之要近聞徒罪以下人犯業經奉有 恩旨 勅部分別減等釋放矣臣謹密請我 皇上特降諭旨曉示內外臣工嗣後辦理一切刑名案件務秉虛公常存忠厚固不可姑息為懷致有廢弛之患更不可刻覈相尚致傷寬大之仁至於律令既定遵守不易非大不便不可輕議增改况物情萬有不齊焉能事事定一條例查名例內開斷罪無正條者引律比附應加應減定擬罪名議定奏聞等語是律令該載不盡事理原有此條可遵似毋庸多設科條

致滋繁擾臣請嗣後臣工條奏刑名案件有於舊典外請增科條者概行禁止其有於舊典中斟酌損益或從寬改嚴或從嚴改寬者亦令該部將舊典與現在事勢細加確核果有格礙難行之處然後議改將情節詳細聲明進呈恭候 欽定其言之一時似覺可聽而行之日久不能無弊者俱不得濫議更張以重法守如此庶綱紀定而刑罰清自足以昭時和而臻至治臣伏念 列祖世宗積德累仁之厚 皇上御極以來仁漸義摩之深惟恐臣工內漸尚嚴苛有累 聖朝德化是以總總過計防患未然不揣愚昧冒瀆 聖明伏乞 睿鑒請定兵役緝盜賞罰疏 乾隆十五年 布蘭泰直隸古北口提督臣布蘭泰謹 奏為謹定兵役緝盜之賞罰以嚴汛守以靖地方事竊查直隸為 畿輔重地五

方輻輳良頑錯居臣自抵任提督一月以來接見各屬呈報盜竊案件六十餘起除本家當時擒獲之外兵役弋獲者寥寥數人夫苟汎地稽查嚴密則宵小何能托足犯事即行弋獲則贓物未至花銷 國家設兵衛民星羅棋列原以剪除奸宄寧謐地方為首務若仍因循成習怠玩成性既不能弭盜于未萌又無以緝盜于已往非有以整飭而激勸之其何以肅營伍而嚴汎守也 臣思激勸之道莫善於賞罰行則人思鼓舞振作以盡力於所事伏查定例地方失事專汎兼轄之弁員均有疎防降罰之處分弋獲則有加級紀錄之優叙外委千把總二叅不獲有重責二十棍之罰是各弁員之賞罰固為嚴且備矣至於汎兵則遇強竊事件三月不獲僅予三十四之笞及其已獲從前雖有該管營員酌量給賞之文而未議及何項支給究

屬有名無實唯緝獲別汎盜賊有令失事地方官捐給賞銀之成例耳是罰既輕而賞復有缺由是汎兵遇有本汎盜竊案件前無可冀之賞後無可懼之罰因之平時在汎務為偷安苟且以自便迨夫失事報官則與地方捕役彼此觀望任賊遠颺而不顧而且盜案因有弁員之叅處尚知戒懼竊案並無勒緝之拘提任意疎虞此所以盜竊多而弋獲少也夫盜之生也始于行竊既而習慣成夥以行盜由來有漸是盜固當防竊尤未可輕縱 臣請嗣後直省地方遇有盜竊案件專汎官弁一面申報上司一面選差汎兵協同地方官役踴緝如一月不獲該管轄官弁照依督捕有司之例按月提比每案將承緝汎兵重責二十棍勒限嚴緝務獲倘能一月以內緝獲本案首盜者照依緝獲別汎盜賊一月以內之例賞銀二十兩獲夥盜者每名

賞銀十兩緝獲竊盜者按每三名酌給半賞銀十兩一月以外緝獲本案首盜者照依緝獲別汛盜賊一月以外之例給銀十兩緝獲夥盜一名者酌給半賞銀五兩緝獲竊盜者每三名亦給半賞銀五兩其緝獲妖言妖書及強竊窩家響馬老瓜掘塚等賊均照首盜夥盜分別給賞緝獲拘摸亦照竊盜等次賞給其支給之處臣查現在各營俱有恩賞生息及公費銀兩除給紅白費用外尚有盈餘即于此內酌量支給以公濟公另冊報銷似可益地方而勵營伍罔非聖澤之汪洋如節次緝獲本汛別汛首盜夥盜五名以上竊賊拘摸十名以上者驗其才技弓馬以次考拔步拔戰戰拔騎騎兵則給以額外委把總頂戴隨汛差操如操防勤慎准其遇缺實補以示勸勵若有誣良私拷等情察出按律例治罪賞懸於前罰隨於後

賞無糜于公帑罰非責以非分用隨其才而不濫功從其厚而非過俾各汛兵知賞之足據而罰之可憲去其怠慢作其勇往防範于平時追擒于已往庶盜風寢息而閭閻獲安堵之休胤竊潛銷而地方享無事之福矣臣蒞任之始提屬營汛已過題定巡查之期容俟聖駕霸州行圍臣扈從事畢再照例親往巡查如有應行酌定事宜另摺恭奏請旨遵行外今據現在各屬呈報盜竊情形不敢稍自寬假用竭千慮之愚冒昧陳奏請定巡洋會哨之法以重海防疏乾隆十五年

喀爾吉善

閩浙總督臣喀爾吉善謹奏為請定巡洋會哨之法以稽勤惰而重海防事竊照閩浙兩省海洋綿亘數千里北抵江省南接粵洋臺澎直達西南外番院正對東洋各島

其洋面險遠島嶼紛錯外洋賈舶與內地商漁絡繹往來
汪洋浩瀚之中汛守防護所不能及惟藉遊巡舟師實力
哨巡使奸宄無從窺伺商賈方獲安寧而遊巡舟師之實
力哨巡與否尤藉總巡大員親身督察無稍懈弛始於洋
面實有裨益臣蒙 聖恩簡畀閩浙封疆時時以綏靖
海洋為急務每當水師鎮將輪值巡洋之期嚴切囑付務
令往來洋面搜緝島嶼復不時派出備弁巡查南北兩洋
察核勤惰茲臣就兩省巡洋官兵熟察其往來洋面情形
詳覈其跟踪會哨虛實因知從前立法尚未周詳亟應酌
增以程益實者敬為我 皇上陳之查巡洋定例每年
二月初一日起至九月底止鎮臣照題統轄洋面總巡各
營照題定界址分巡仍與上下接界總巡分巡官兵指定
島嶼會哨是總巡會哨一法非特聯絡聲援實可稽核勤

情今查鎮臣雖有總巡之責不定以巡洋限期會哨雖有
指定界址未定有查驗章程現在各鎮臣未嘗不出洋巡
查然出巡之期或疎或密巡歷洋面或近或遠竟無一定
更或因辦理營務不能久歷外洋出巡未久隨報回棹者
至如浙省定海温州黃巖三鎮因係水陸相兼巡期難以
遍歷題定不時親身出洋更無一定程限總巡大員出洋
督察之日少分巡將備千把懈弛偷安勢所不免即使按
期呈報出洋哨巡或灣泊近島或寄碇深澳其是否在洋
梭織遊巡茫無稽考至於交界會哨惟憑一紙報文其實
於何處會哨亦無可徵驗洋匪窺伺巡歷稍疎乘間剽劫
為害商賈殊非慎重海防之道臣查鎮臣總巡洋面近者
不過數百里遠亦不出千里自二月出巡至九月撤巡計
期八閱月為時甚久應請定以每兩月與接界總巡官兵

會哨一次遇應會哨月分上汛先巡北洋後巡南洋則下汛先巡南洋後巡北洋如浙省定海鎮先巡北洋與江南崇明鎮會哨於大羊山後赴南洋與黃巖鎮會哨于石浦港黃巖鎮則先巡南洋與温州鎮會哨于沙角山後赴北洋定海鎮會哨于石浦港温州鎮則先巡北洋與黃巖鎮會哨于沙角山後赴南洋與閩省海壇鎮會哨于南關海壇鎮則先巡南洋與金門鎮會哨于門桶後洋後赴北洋與温州鎮會哨于南關金門鎮則先巡北洋與海壇鎮會哨于門桶後洋後赴南洋與南澳鎮會哨于將軍澳如此蟬聯遞相先後則上下兩鎮哨期不致歧誤可免守候耽延之責督臣於各鎮應會哨月分先遣標下員弁齎捧令箭徑赴會哨島嶼等候必俟兩鎮會齊取具印會報文以為徵驗仍令各鎮將歷過洋面各營分巡防汛兵船逐一

查點分別勤惰據實開報督臣察核懲究叅處其分巡營員會哨地界更屬近便上下洋面不出數百里應請定以一月會哨一次亦照總巡會哨之法上巡先北後南下巡先南後北定期於分界島嶼會哨其會哨時先令總巡鎮臣派船差弁齎令箭往會哨處所等候必俟兩汛兵船到齊取具鈐記押結通報如違誤不到揭報叅究如此立定期限期實力督巡不特巡洋將弁偷安規避有可稽察即鎮臣有不實力督巡如期會哨者一經察出亦以規避巡洋叅處既符總巡之成例更收會哨之實效似于綏靖海洋之道不無小補至閩省臺澎水師與內地隔越重洋向例係副將總巡遊守分巡應請仍照舊例遵行臣因事關海防重務與福建水師提臣張天駿浙江提臣譚行義往返商酌意見相同謹繕摺具奏伏乞 皇上聖鑒勅議施

行再照閩浙兩省鎮臣總巡既請定期會哨其江南廣東二省洋面與閩浙聯界應畫一定議遵行

請修豫省河道疏乾隆十五年

鄂容安

河南巡撫臣鄂容安謹 奏為奏明事竊查豫省惠濟一河自中年縣西十五里鋪起經祥符縣陳留杞縣睢州淮寧鹿邑等處至江南亳州入于渦河以達于淮雖為分減賈魯河異漲之水而各州縣溝坡雨水亦皆賴以宣洩自乾隆六年議請每年動支耗羨銀四千兩為歲修疏復之用其挑河之土分積兩岸修築子堰並築涵洞仍于下游鹿邑地方每歲秋分築壩蓄水立夏開壩放水等因奏准在案迄今河成九載年年俱報歲修臣因修理年站往來河干見河身淤墊之處甚多檢查歲修卷案遞年所領銀兩雖屬無多恐終不歸實用是以臣於十四年即令動支

專委熟悉河工之員詳細勘估臣於查勘各屬水利時復加履勘核計土方工價若同時一律興工原設歲修恐不敷用經臣於具奏各屬河渠摺內聲明詳酌另奏隨委管河道佟世表前往逐一確勘復令布政使富明親勘核議今據該司道勘議前來臣與當面詳籌並細加查核從前估挑工段或淺或深原有不能一律深通之處遞年挑淤濬淺亦僅照原估而止未能深通暢注若不急加挑浚必致漸積漸淤轉使前功廢棄查河勢西高東下除下游之柘城淮寧鹿邑等境河身通暢毋庸挑浚外其上游之中牟祥符陳留杞縣睢州五邑或較原估淤淺應行開挖寬深或因地勢居高應行再加挑濬但原議內應行酌改者如兩岸原經築有堤工而又以挑河之土臨河加築子堰無論河土浮鬆遇雨即卸即便加工堅築而逼近河身大

溜直衝子堰勢必塌坍其水之全力直注大堤則堰不可保而堤亦隨之子堰之築非徒無益實為有害應將挑工之土運至大堤加高培厚俾得永遠鞏固前議築子堰之處應行停止又如兩岸涵洞率多卑薄水過即塌而所建亦非其地徒有涵洞之名未收啟閉之益應於沿河坡窪地方便於出水歸河之處將堤身酌留口門用石包裹兩頭以防水流衝刷平時仍於口門內堆築小堰一遇積水聽民開放入河水涸仍前修築關欄則蓄洩咸宜可免坍塌前議涵洞之處應行改建再如鹿邑河尾於秋分築壩立夏開放原為蓄水濟舟而設查商船由亳州而入惠濟建壩則舟楫難通况柘城鹿邑交界現有砂礮足資攔蓄此即天然蓄水之壩前議分時蓄洩地勢既非所宜且於水利無益鹿邑河尾應停其建壩所有惠濟河開挑工程

共需銀三千九百八十九兩零尚在歲修四千兩之內應即動支乾隆十五年歲修銀兩於霜降後遴委幹員分地分段及時挑浚仍責成該管道府往來查催加意稽察務使如式深通以收實效統俟工完核報至改建涵洞加培大堤等項約需銀二三千兩應於來年歲修項下確估動用工竣照例報部核銷再查惠河來源出於賈魯河由鄭州至中牟方行分洩而鄭州窪下之區係賈魯河經由之地滙成大湖伏秋河湖並漲鄭中二邑民田年年多被淹浸今議於鄭州之唐雷莊起挑挖一道直接至惠濟閘迤北入河則上游之水節宣有資鄭中二邑素被水患處所均可涸出水旱田地數百頃需費無多而為利甚溥鄭中居民無不踴躍從事情愿自行開挖現在雖未完竣已於農隙興工頗有實效伏思水利所在務須窮源竟委通盤

區畫今臣與司道等相度情形將應改之處悉心計議務使源清流暢河道深通而於民田廬舍均有裨益以仰副聖主軫念閭閻之至意

籌淮北溝渠事宜疏乾隆十五年

胡蛟齡

浙江道監察御史臣胡蛟齡謹奏為敬籌疆理淮北事宜以甦民困事竊江南徐州府屬之邳宿諸州縣海州並所屬之贛沐諸縣皆係河淮下流而海州上承東省來源下游逼隣海浦每春夏之交栽植甫畢橫流隨至渺瀰一片不見阡陌窮民有種無收應輸正賦不能常年請豁歲歲停緩終須帶徵積欠在身譬則負戴千觔不得伸眉仰首民困蓋已極矣近者屢蒙 恩旨疊次蠲除並令督撫河臣會同查勘設法疏通而水患終不能免竊思淮徐土著之民既不可遷徙遠適又不能力與水爭田廬室宇

動遭淹沒勢將何所底止謹按明人治河之議有云宜於濱河之處倣江南圩田之法多為溝渠使足容水臣愚以為此議或難驟行之於北而似可通用之於南今臣訪聞徽州人民寄居海州者每置買田畝周圍築隄捍水隄內多為溝洫隄間安設斗門相時蓄洩一如圩田之制無論旱澇歲獲有收此則成效已經顯著又查乾隆十一年八月內原任吏部尚書高斌會同原任督臣尹繼善等於欽奉 上諭事案議將海州一屬令地方有司勸諭居民修築圩岸其隣接海屬之宿遷桃源清河安東阜寧等縣亦一例辦理以期共收實效今數年以來該處作何辦理其實在情形無從委悉伏祈 勅下督撫諸臣查照前議嚴飭地方有司勿以粉飾邀名勿以畏難中止勿以未經查核恐干失察通同隱匿致隳已就之緒仍遴委大員

帶領諳練農民親身經理並將作何督率推行堪於數年
內績成大功之處確切定議恭候明歲 聖駕南巡於
相視河淮之暇臨期奏請 裁決庶淮北百萬窮
黎幸獲更生而 皇仁萬世永賴矣

皇清奏議卷四十六

臣等伏查河淮一帶向來水患頻仍災黎流離
早經奉旨督飭各該督撫嚴加查勘並飭令
該部會同該督撫查明災情分別輕重酌量
蠲免錢糧以資接濟嗣因年久失修淤積日
深以致水患益熾民困益甚臣等伏查河
淮一帶向來水患頻仍災黎流離早經奉
旨督飭各該督撫嚴加查勘並飭令該部
會同該督撫查明災情分別輕重酌量蠲
免錢糧以資接濟嗣因年久失修淤積日
深以致水患益熾民困益甚臣等伏查河
淮一帶向來水患頻仍災黎流離早經奉
旨督飭各該督撫嚴加查勘並飭令該部
會同該督撫查明災情分別輕重酌量蠲
免錢糧以資接濟

皇清奏議卷四十七

請定經制以節民用疏 乾隆十六年 孫宗溥

掌貴州道監察御史臣孫宗溥謹 奏為請酌定經制以
節民用事伏惟我 皇上宵旰圖維民依念切本年

巡幸江浙因地方習尚紛華蓋藏未裕疊蒙 諭旨

飭勵臣民凡欲使易俗移風共臻仁壽之治此教養斯民
之至意也竊思風俗之奢靡其致之也必以其漸則更化
之道固非刑驅勢迫之所可強制亦非家喻戶說之所能
遽曉即在守土之臣如郡縣吏與民最親有化導之責然
使任以經畫民間日用之事而漫無繩尺可守則將因循
而任其自然又或苛細而近於紛擾其於轉移風俗之道
究難濟於實用是必酌定章程為之限制使有司得所依
據小民知所適從然後返樸還淳可以歸之畫一夫食時

用禮聖人治世之大經也記曰國奢則示之以儉國儉則示之以禮蓋由儉而流於奢民所自為也由奢而返於儉則民不能自主在立度數以節之臣嘗熟察今日之民情不患其好侈而不節正患其欲儉而不能何者漸染已深勢難驟改即如江浙人稠居密生齒無窮物產有限衣食之計亦甚艱矣其中殷實之家豪華自喜藉以誇耀鄉鄰者固不乏人至於勉強徇俗剝肉成瘡而黥然不樂者甚多蓋其心實不願奢亦且其力萬不能奢而隨俗波靡不得獨儉如婚禮不奢人以為薄於姻戚喪事不奢人以為薄於父母宴會不奢人以為薄於賓客一家為之則鄰里竊議矣一人為之則入室交詬矣然則俗何由變用何由節而財更何以豐乎是非奉朝廷之法制以均節之則其拘攣困苦於徇俗之情終不得解康熙年間撫臣朱軾

任浙時凡民間婚喪二禮及祭享宴會皆為畧定規模其一切無益之費概行禁止士民翕然從之頗為稱便此其明驗也臣請勅下各該督撫轉飭州縣官各條舉其土俗糜費之甚灼然在所宜禁防者某事彙之督撫督撫為之裁議妥協均立規條恭呈睿鑒而後下之有司首禁其非禮之費如聚眾迎神科錢演戲之類次禁其托於禮而實為無益之費如婚喪競侈貴賤無等之類於教化之中立制防之限所謂因其勢而利導之也又凡所立限制只須治去太甚疎節濶目使之截然可行原無事委瑣細碎煩苛滋擾如此則人情胥協教令易從富者有節貧者無愧風俗可以漸淳蓋藏可以日裕似於教養斯民之道不無稍有裨益爾

籌戎政事宜疏 乾隆十六年

莽阿納

雲南開化鎮總兵臣莽阿納謹奏為敬籌戎政事宜仰祈聖訓事竊臣愚陋庸材仰荷皇恩三界總兵重任雖殫竭駘駘難報萬一凡此營伍事務皆分所應辦又何敢瑣瀆宸聰第措施不當辜負聖恩是以心與身不敢一日偷安致滋虛糜之愆謹陳數事仰懇訓示折中

一官兵步弓宜遵例全改五力以上也查營中軍器首先弓箭務須箭長弓硬方能致遠出箭平直易於中的臣每於臨場考驗查看兵弓新舊不一輕重參差多緣無力修製因循將就行令中軍逐一稽查據稱三營內除五力以上堪用之弓不計外內有堪用應修弓一百八十三張即飭辦料修整加筋添力務足五力其有不堪使用弓三張亦即另為新製五力散給射用共費銀五十七兩一錢零

臣性甘澹泊隨事節省捐益窮伍稍緩兵力又捐製五力以上弓三十張把箭四十面每日於未申二時在署旁箭道內臣親率步射令願學射者不拘馬步鎗手餘丁通准隨班輪流演習現成弓箭不費己資人人爭射指授射法領會者多從前後肘過高撒放無力之處今則弓硬箭長肘平拉滿撒放結實已改十分之六矣

一馬弓與射法宜照步射一式也查雍正十三年署天津鎮臣補熙奏准定例官兵馬箭不得另用軟弓務須馬步一弓拉射指法當與步射一樣奈例行已久合式者固有不遵者甚多俱另用軟弓或將兩指捻扣翻勾弦於次指中指之間或滿把拉弓夾箭於次指中指之中惟圖出箭離弦全無準頭且有將弓梢插入檔內施展不能自如均屬有違定式臣每於考驗之時務必親為騎射以示適從

惟恐積習相沿驟難更易復又寬以三月之限務令通行全改成歸合式

一馬兵騎射宜鎗箭二技也查武場舉子考試一馬當須三箭以規嫻熟而馬兵專在武藝獨射一箭無以見其優長況馬鎗一項為軍中之利器凡兵丁一挑馬糧即置鳥鎗於不論日久自然生疎以已得之技令其復失殊為可惜或有竟由步弓箭挑拔馬糧未曾一試倘遇馬上應用鳥鎗之處又將何恃無恐臣見直隸等省操演馬兵一馬俱係先打一鎗後射一箭而滇省並未一見請嗣後操演馬兵通照直省之例馬上騎射務須先放一鎗後射一箭庶見技藝之純熟而鳥鎗不致於生疎矣

一鳥鎗兵丁宜遵例練打準頭也查火器之中鳥鎗最為便捷身法固不可少而準頭尤為緊要殊不知準頭即在

身法之中左右兩手高卑有分進退聯環上下相應心眼俱到中把自易臣復遵乾隆元年 上諭再為申告行令本標三營及武潯二營凡演習鳥鎗既須身法合式又當遠立把子加裝鉛子習打準頭純熟中多者有賞不中者有罰現俱能有準頭日就純熟

一鳥鎗手宜兼習弓箭也查營中弓箭鳥鎗均為衝堅破銳之利器而鳥鎗一項尚有陰雨潮濕火門不過之慮未及弓箭之施展自如不避風雨便捷較勝也是以考拔人材首重弓馬凡習弓箭者得以由步拔馬由馬拔官循級而陞至鳥鎗演放純熟原屬軍中利器而平時不能弓箭挑拔馬糧例不入選每見鎗手中有漢仗壯健出師功苦者終身一餉上進無階即或憐惜人材難得拔為弓箭步糧令其加意學習望可造就無如年歲過大骨硬腰直項

強肩堆驟難如法仍未便拔補馬糧殊為可惜與其強學於拔補之時莫若預演於未挑之先夫功名之會人所爭趨慎察輿情俱皆心願自令學習以來捐製弓箭任其拉射人人奮志現在餘丁皆能步射日久自必精進凡有人材自不致於廢棄矣

一佩帶腰刀宜練習用法也查官兵佩帶腰刀原資防範禦敵之用若不知使用之法是有刀與無刀等現今奉文逐一加鋼刀則利矣問之官兵之中惟鎗手能用其餘馬步弓箭兵丁未曾學習倘遇邊兵相迫一時鎗箭不及施展非刀無以捍格是使用之法急宜講練臣已通飭所屬俱令加意學習馬兵務習馬上腰刀之法步兵餘丁當學步下腰刀之法日漸學習現有十之三四但學習腰刀原屬分內之事而廢弛日久反若視為額外之操若不定以

必練之勢終難望其人之純熟請嗣後考拔馬戰名糧以及外委千把員缺務於烏鎗馬步弓箭之外復考其馬步腰刀若能挑砍架槩純熟得法者方准挑拔自必人人練習可望純熟矣

一技藝優劣宜分賞罰也查兵丁技藝原當習練嫻熟而董率之員示以信賞必罰更足以動激勸之心臣酌定凡步箭五枝全不中者責做層次降糧中一枝者勒限學習中二枝者合式中三四五枝者分別獎賞五箭俱中者即為記名烏鎗打把三鎗俱不中者把內有不過門者責做雖不中把而聲響結實者勒限學習中一鎗者合式中二三鎗者分別獎賞三鎗俱中者即為記名馬兵騎射生疎鎗箭俱不能出者責做降為步糧鎗箭雖不能中而不致於生疎者勒限練習一馬能於鎗箭之中上把一次者准

為合式鎗箭俱中者獎賞記名仍於技優記名之中彼此較勝以為拔補之次序

一官兵備箭宜照數實貯也查內外文武官員以品級之大小定備箭之多寡陞遷隨帶損壞添補例行已久自應實在製備而邊木巖疆更宜有備無患况例內在京文員尚須預備在外武職更有防禦之責豈容置之不論臣歷任經由之處每為查問兵多製貯官因陞調駛運為煩遂爾因噎廢食不製者多殊與定例有違竊思武職以弓箭為本務况箭為軍中首先利器寧可百年不用不可一日不備請通飭内外文武官員一體照額定數目製備長箭新舊接任即在交代不必隨帶以免馱載之煩遇有損壞隨時修補造入軍械冊內一體盤查保題如值查點之期缺少不備即以缺軍器叅處

一盞甲旗幟宜慎披執也查中樞政考內開盞甲旗纛軍裝等項除查驗操演日期及本管大員經過查點穿戴執持外如 欽差大員經過該巡防弁披執迎送將該管官罰俸一年等因遵照在案查委員點驗旗幟盞甲務要鮮明如遇本管大員經過適值天雨滂沛若不穿戴披執有違定例若遵例而行難免虧銹或有上司目覩淋漓令其避脫已屬無及即或公費有餘亦不肯以無益之迎送而損有用之甲幟况滇省公費不足每多長用而猶執此定例似非慎重軍裝之至意且滇省遠處天末旗纛盞甲製自粵東往來盤繳價值又昂更宜可惜嗣後除查點及大操迎春喜神霜降仍遵舊例穿戴執持遇有陰雨該管大員隨時酌用外如遇本管大員經過只穿戴號衣號帽執持舊存旗幟迎送庶軍裝不至易舊而公費可少省矣

以上九條多屬愚昧然臣心意中無非為調劑整頓起見
欣逢 聖主不避瑣瀆條晰以陳其中或可行之本標
或可通行各省或意見淺鄙尚未妥協統祈 皇上訓
示遵行

請考察駐防哈密官兵疏乾隆十六年永 常

安西提督臣永常謹 奏為請將哈密官兵亦照北路軍
營之例於班滿回營之時考察勤惰分別等次造冊咨移
以示鼓勵以裨防務事臣竊查哈密防兵例派叅游二員
都守四員千總八員把總十二員外委兵丁二千名二年
一次分班更換更換之歲在於安甘涼肅四提鎮營均勻
分派四月內更換一半八月內更換一半新舊相間以資
教習官兵抵防之後若有事故缺出即在防所官兵內遞
相拔補歷來辦理原俱妥協無須置議但查哈密防所軍

務關重派往之官兵臣等與營員皆係慎加挑選官則必
取年力強壯熟悉戎行之員兵則各挑漢仗精健黽勉勤
慎者方敢派發以益防務該官兵平素仰荷 皇上養
養深恩至優至渥得以赴防稍效奔走誠屬踴躍從事趨
將恐後惟是防所全局專仗卡倫該官到哈更須選擇十
分精細之人方令分班赴卡坐守瞭望哈密各卡設在天
山一帶並郭壁邊境天山乃極寒之地陰多晴少所作卡
倫均於山頂晝則潛身遠瞭夜則伏路靜聽夏被雨水浸
淋冬乃伏居冰雪之中臣曾經兩至各卡目擊其苦為之
挖坑苫蓋使稍可遮蔽身體然內濕外寒晝夜不息勤苦
日甚所以踴躍赴防甘此勤苦者多思上進以圖一命之
榮今防所雖遇事故缺出可望超擢奈防員無幾長班不
得一缺既無以示鼓勵為該兵黽勉之地且本營遇有缺

出又因該兵遠在駐防不能擢用迨至二年班滿回營或其所知之本官陞遷事故或其所知之提鎮陞調他往新到之官不知該兵之能否遂致所有之材往往隳其志氣而自抱老於卒伍之嘆臣因思及昔在古北提督任內竊見直隸宣化等鎮派往北路駐防官兵於班滿回營例由軍政大臣考察其在防之勤惰驗看其所負之材技分別等第優者列為頭等稍優者列為二等平庸者列為三等造冊報部由部記檔將冊咨移該督提轉發該本營俾其遇有官弁缺出即將註冊之頭二等官兵以次與在營合例應拔之官兵相間擢用寓選拔於考核之中使兵丁咸有上進之階得以習力奮勉實屬鼓勵防兵之善法今哈密防兵事同一律獨此例未行似非仰體我皇上軫卹勞人一視同仁之至意用敢冒昧瀆陳叩懇 天恩

請將哈密防所官兵嗣後於班滿回營之時亦令駐哈鎮臣仿照北路軍營之例將其防行走勤情慎加考察分別等第造冊咨移由臣再加詳慎秉公勘定核實報部記檔轉發該營亦照直省之例拔擢錄用則西北兩路軍營事例既皆畫一而該官兵將來聞有征防之事愈知踴躍奮勉殊於軍務有裨矣

請修溝河以弭水患疏 乾隆十七年 陳宏謀
河南巡撫臣陳宏謀謹奏為請修緊要溝河以弭水患以卹災黎事竊照豫省歸德一府在省城之東南所屬商邱夏邑永城等縣地處窪下上承開封等屬之水下達江南宿州等處舊有之河日漸淺窄每遇夏秋雨水畧多河不能容水漫平地即成水災歷考從前自乾隆四年至今乾隆十六年計十三年之中歸郡九州縣成災者八年歉

收者三年中等有收者纔二年幾於無地不災無歲不賑
現在倉穀空虛有止儲穀百餘石及數百石者連年賑給
皆由遠處撥運即使今後設法備貯而時有災傷有借無
還倉儲仍歸空虛小民年年望賑風俗亦漸刁疲矣先經
前撫臣碩色奏請疏通河道續經撫臣鄂容安逐處相度
奏請將豫省淤淺之處次第開濬並多挑溝渠以資容納
近年地方官督率小民開挑小溝頗多祇緣下游江南宿
州境內之梁家橋翟家橋河道淺窄又有沙礮阻遏尾閘
未暢徒開上游亦難宣洩且恐倒漾為患是以未即興舉
臣到任查勘災賑所到被災地方就其水到之處得其受
災之由歸德一郡之水均由永城以達江南臣由永城縣
直抵江南交界之宿州等處閱看豫省河流去路如宿州
境之渦河一道業已深通直至淮河從前阻塞之巴溝如

梁家橋翟家橋等處業經河臣高斌題請動項挑挖另
開越河改寬橋座巴溝之水由灘河以入洪澤湖經部議
覆奉旨允行現在興工疏濬則江南下游業已通暢
豫省歸德一郡之水不患尾閘不通惟患中多壅積正宜
及早開修以廣宣洩臣一面將豫省溝河何者應歸民修
何者應歸官修委員分別勘估一面將查閱緣由恭摺奏
聞在案今據布政使富勒赫具詳行據委員等逐段
勘丈分別民修官修估計具詳前來除商邱之沙河陳梁
沙河夏邑之毛家河岐河虞城之永豐溝惠民溝夏坡河
橫河永城之色河滄河或係交流小溝或止間斷淤淺工
段無多均令地方官督率民力挑濬外其商邱境內之豐
樂河自朱家雙廟前起至夏邑交界之響河止計長二十
四里一百五十四步零夏邑境內之響河自商邱縣焦家

莊起至永城縣交界之巴溝河止計長六十七里二百七十步永城境內之巴溝河自夏邑縣交界朱家橋起至梁家橋江南交界止計長九十五里三百三十五步均為該處管水洩水之幹河河身均已淺塞急宜挑挖寬深非民力所能勝任又商邱縣南門外有古宋河一道下達江南之渦河河身淺窄紆迴宣洩不利以致西來諸水均滙集於府城內外常年不消應於古宋河東西附近城濬處各開引河一道並將舊有古宋河挑挖寬深以資宣洩保護城池地畝並添設板橋三座永城縣加幫護城隄一道以上各工共估需土工料銀六萬六千六百餘兩查有續收之輸工銀十萬三千餘兩前撫臣鄂容安奏准存貯留充地方公用如蒙俞允請於此內動支查商邱夏邑永城皆今年被災較重之地一入新春加賑已畢乘此將緊

要工程接續興修災地貧民得以趁食工程亦可速竣統責成知府陳錫輅督率監修再委道員往來稽查仍令藩司另造工段土方工料銀兩細冊咨部查核再所開各河內惟永城巴溝河為諸水咽喉此一帶地勢本窪所有挖河之土即於兩岸築隄倘遇上游水多下游一時難洩聽其稍為停蓄小水之年岸即為隄大水之年以隄為岸均不至於四溢為患仍開涵洞以洩溝水其築隄之費不另請開銷惟隄外之河灘地畝久已成糧今既開河築隄隄內之地可無水患隄外之灘地難免受淹永城之民頗有藉名求賑之惡習請將隄外之灘地額糧豁除聽民種植蘆葦等類將來如水浸隄根河灘被淹亦不報災庶免灘民年年希冀報災請賑也其所挑之河所築之隄均責成地方官分段交於有地之戶年年挑挖修築每年於春融

之後夏汎之前委員會同地方官查明出具河無阻淺隄無殘缺印結通報庶河隄常保無虞幹河既通凡近河受水之處均可多挑小溝洩水入河歷來受水之區可以免於災患較之年年報災放賑所省寔多而歸德一郡官民永沐 聖恩於無既矣

陳捕蝗利弊疏 乾隆十七年

莊有恭

江蘇巡撫 臣莊有恭謹 奏為備陳捕蝗利弊仰祈

聖訓事竊照蝗蝻為害田禾以致上履 宸衷屢頒

明訓 臣職任封疆敢不竭力督捕悉心研究伏查蝻子初發皆係叢生所占不過數尺之地多亦不過十餘丈而止若彼時立速撲捕即可消除惟羽翼既成則四散蔓延多費人力州縣該管地面大者三四百里小亦百有餘里寥寥數十名吏役原難徧歷巡查即保正鄉地可以就近

搜尋而地角田頭亦難履畝親到惟種地農民每戶不過數畝而又日在田間耘耨蝻孽萌發斷無不知但定例止有責成官員捕捉之條而無責成地主舉報之例雖屢奉捕撲踐踏給工本之 恩旨其明大義者固感激樂從而奸詐之徒惟恐得不償失且希延至飛躍即可移禍鄰田是蝗蝻為害實皆農民諱匿釀成以 臣愚見嗣後每歲一交四月除荒山大澤河灘湖蕩無主管地責成官役梭織巡查飛報外其餘民地應請責成地佃巡查甲長舉報蝻孽一有萌生甲長一面撥夫撲捕一面通知地保報官即撥鄰保協濟如果通同諱匿別經發覺地佃甲長俱照不應重律當場責懲地保用小枷枷示仍令督夫搜捕淨盡然後釋放如已報到官而州縣不據實申報親赴督捕者仍照定例特疏嚴叅再查捕蝗定例僱募人夫每名計

日給銀以為飯食許報明督撫據實開銷原屬念卹農民至意但 聖主之恩膏愈厚而奸民之情偽愈生百姓恃有僱夫之例見蝻不肯自捕及應募受僱又復虛應故事希冀日領錢文因以為利州縣無可如何只得變為收買之法每蝗蝻一斗給錢多至三四十文民始踴躍趨事而奸民又有見蝻不肯即報待至長大捕買希圖多得錢文者是蝗蝻雖經捕淨而州縣所費已多司庫公費有限既難據報開銷州縣養廉無多又難悉責捐墊雖曰愛民實非長策查撲捕蝗蝻原係為民除害官弁猶暴露於風日豈百姓轉應偃息於家庭應請嗣後除荒山大澤河灘湖蕩無主管地生有蝗蝻仍照官給飯食或酌量收買外其民間糧地以及有主洲場俱責成地佃捕捉地主督催或撥鄰村夫役協助不准冒銷如此議定責成將農佃既不敢匿報於初生亦不敢緩捕於臨時庶 聖主之恩波不溢而奸民之情偽難施矣

請除蝻種疏 乾隆十七年

周 燾

山西道監察御史加一級 臣周燾謹 奏為敬籌除滅蝻種之法以衛田禾以重民食事伏惟成周多稼螟螣務除姚崇捍災焚坑並設定例蝗蝻生發地方責令有司撲捕有不實力從事者處分甚嚴然上懸為令甲下應以空文甚或甘受處分毫無補救及根究蝗蝻起處則鄰封互相推諉希圖卸責亦其勢不得不然也我 皇上子惠黔黎痼瘵在念上年閏五月間直隸河間縣偶有飛蝗即 勅諭督臣令所在州縣預為防範杜絕爾時臣工亦曾 奏申嚴議敘處分之例 臣竊見事關民依因再四諏訪備細研究始知捕蝗不如除蝻除蝻不如滅種謹以芻蕘之

一得為我 皇上陳之蝗蟲始由化生繼則卵生化生者低窪之地夏秋水停淹魚蝦卵育迨水勢涸落魚子散在草間霑惹泥塗不能隨流而去延及次年春夏生機未絕熱氣炎蒸陰從陽化鱗潛變為羽翔而蚋孽萌生矣其初出穉小如蟻漸如蒼蠅而色黑數日則大如蟋蟀而無翼土人名為步蚋及時撲滅猶易為力若再過數日則長翅飛騰隨風飄颺轉徙無定其棲集之處禾黍頓成赤地若最盛則蔽日遮天盈地數尺墮埋人間房屋遠望如山縱行撲捕亦苦人力難施其為害殆不可勝言矣迨至蝗老身重不能飛翔則又羣集種子其種子也以尾深插堅土遺卵入地形如小囊內包九十九子色如松子仁較脂麻加小種子在夏則本年復生種子在秋則患延來歲苟非冬雪盈尺肅以嚴威至春融啟蟄之後滋生更繁害

稼更大若各處撲捕之情形則亦有可得而言者有司縱不愛民不能不畏處分畏處分即不得不張皇撲捕於是差衙役糾保甲撥烟戶設廠收買似亦盡心竭力不敢膜視矣然有業之民或本村無蝗撥往別處撲捕惟懼拋荒農務往往囑託鄉地勾通衙役用錢買放免一二人為賣夫免一村為賣庄鄉地衙役飽食肥囊再往別村仍復如故若無業奸民則又以官差捕蝗得日食工價為己利每於山坡僻處私將蚋種藏匿聽其滋生延衍流毒待應差撲捕之時蹂躪田疇搶食禾穗害更甚於蝗蚋聞地方官值蝗盛之時往往束手無策不過叩禱劉猛祈以神力驅除要皆循行故事未嘗講求拔本塞源之計者也臣聞蝗所自起不過化生卵生二端化生者宜於水涸草枯之時令地方官董率百姓縱火焚燒叢穢之區盪以烈焰草根

魚子都成灰燼永絕孽芽卵生者春深風煖土脈鬆脆輒
募民於前歲蝗集之處掘地取種陸續送官酌酬價值恪
遵上年閏五月間欽奉 上諭倣行以米易蝗之令州
縣所收蝻種詳報上司核其真偽動用米穀准於公項開
銷在小民既可除害復得糊口自必踴躍從事而以米易
種較之以米易蝗似覺費省功多倘行之有效亦勤民重
穀之一事也臣伏見沿河州縣上年間被水災加以冬煖
少雪恐將來蝻子蠕動有害農疇合無請 聖慈勅下
直隸山東等省各該督撫令其博採羣議延問野叟務得
真實情形如果事屬有益即一面試行一面酌定章程奏
請 勅部定議臣不勝悚惶待命之至

皇清奏議卷四十七

皇清奏議卷四十八

陳河工事宜疏乾隆十八年

嵇璜

戶部右侍郎臣嵇璜謹 奏為備陳河工事宜以重宣防
事竊今歲江南黃淮並漲上履 宸衷特遣大臣前往
經理復 命廷臣會議一切事宜臣幼歷河干頗知梗
概雖形勢之變遷各異而修防之法意不殊謹就見聞所
及為我 皇上陳之

一銅山以下清口以上之河身宜挑濬也決口既已奪溜
則河身必至淤高若不挑浚下流則決口雖堵而河流歸
故之後汎水踵至必難容受下游又將告險應將銅山以
下河身及早挑挖深通即難挑之處亦多開河溝既可以
引口門三溜而減堵築之勞又可以待汎水之來而廣容
納之地此第一要務也

一高堰等處石工宜修補也黃水入湖既久則石工罅漏所在多有應趁冬春水勢銷落之際逐一修補整齊並加築堰外之坦坡加幫堰後之工戲則石工鞏固而汎水不畏衝噬矣

一歸仁隄臨湖石工宜修也黃水既漫隄入湖則石工亦必塌卸查此隄所以隔斷睢湖諸水設有三閘相機啟閉最為緊要應及時修補以資障禦

一黃河兩岸之閘壩宜修復也河流自山東入江南境由廣而狹無以減之則隄工所在皆險靳輔之用閘壩減水蓋即古人疏分之意今或日久頽廢宜酌其可復者復之一黃河宜設浚船也治水之法疏之以分其勢尤必浚之以暢其流明臣劉天和之浚沙用平底方船橫排河中置三百觔重五齒之鐵耙於船杪沿流拖治則沙不停積而

河底日深今清口以上之河身舊日本淺宜仿其法以浚之則水由地中行而無雲泛濫矣

一下河宜設專員經理也查下河水利前者鄂禮治之後汪澂治之近尹繼善亦治之其所以不能永遠通暢者則以向屬淮揚道無專員經理之故淮揚道既管黃運江防工程事務至繁不能兼顧隄岸之傾頽河流之淺滯日久不治勢所固然應請設分巡道一員將下河水利令其經理庶責成既專而可無廢事矣

一上游之料物宜預備也江南黃河之險要全在上游五廳大溜所至非埽無以禦之一有墊陷即須鑲墊惟料物預備於先時斯緩急足資於一旦應於冬間辦運分儲各工至來年汎水長發或有昔險今平昔平今險之處俱可隨時接濟但須於辦運之後河臣實力稽查則河員不敢

虛冒而料歸實用矣

一堆積土牛之制宜嚴也河工向設堡夫原令其每日積土以備雨淋塌却之用今或日久廢弛遇搶險之時無從覓土所係非細應責令廳汛等官時加督率務於遠處取土不得近挖堤根致多積水則歲計有餘於增卑培薄之道不無裨益

以上數條皆切近之圖非迂遠難行之事而南河關鍵則尤在五壩之蓄洩前大學士張鵬翮論滾水石壩與清口黃水形勢相照應取勢足敵黃過則聽其滾去蓋洩之太早則不足以敵黃蓄之過多又恐難於保堰其間量雨水之多寡審清黃之強弱不先不後適合機宜既無倒灌之虞又免下流之患則在河臣之操縱而已至於湖河形勢高寶諸湖下於洪澤湖運河下於高寶諸湖下河又下於

運河諸湖西南受滁泗天長之水又益以洪澤湖減下之水舊設南關五里八里柏家墩車邏減水諸壩定有四月六月開放之期因入為出以節宣之以故旱不涸運澇不傷隄今一切閉之不行是姑息下河而轉害於上游也臣聞治水之道宣洩與隄防相為表裏隄防以禦溢槽宣洩以待異漲專事隄防而不講宣洩則大水猝至而無所歸水無所歸究之隄防亦不能固則欲弭患於將來不可不留宣洩之一策也

請開減河疏 乾隆十八年

孫嘉淦

吏部尚書協辦大學士臣孫嘉淦謹 奏為議開減河事
目前黃河事宜仰承 聖訓令臣等詳悉籌畫和衷共
議此事所關甚大頭緒紛繁臣拙於口說不能達意故詳
書所見以 奏竊惟欲導水者必先相山導小水者相小

山導大水者相大山天下之勢山分三幹水別四支恒山九邊是為北幹衡山五嶺是為南幹華嵩泰嶽是為中幹華山之陽江為南支華山之陰河為北支嵩山之南淮水出焉泰山之北濟水出焉此二水者南不入江北不入河自為一派故江淮河濟名為四瀆以其獨行入海也臣所言大清河者繞泰山之東北起東阿而訖利津乃濟水之正道四瀆之經流非尋常之溝壑也依古以來與河別流自宋熙寧十年河決澶州分而為二一由南清河入淮即今之河道也一由北清河入海即臣所言之大清河也黃河始奪淮濟之道矣北宋之末南北分流南渡以後河遂南徙史不言其故大約金人塞北流以病宋可想而知也元初河屢北決輒復堵塞大德初決蒲口廉訪使尚文言相度形勢南高北下宜順水性導之北行決口勿塞為便

而有司卒塞之後蒲口復決水全北流竟如文言至正初河決金隄等處丞相脫脫用賈魯充河防使大開黃河故道水遂安流賈魯稱善治河乃導之北行未嘗令南徙也明洪武時河決陽武東過開封南入於淮而河之故道遂淤正統十三年河決張秋河灣東流入於海景泰時又決張秋宏治時又決金龍口漫長垣趣張秋衝會通河以入海按張秋並非河岸而史屢言決張秋者以黃河北決必經張秋以潰運河史以運道為重故書決張秋也張秋之東不及百里即東阿之山山下即大清河黃河決水不能踰山東走自必順河北行故凡言決張秋者皆由大清河以入海史有詳畧故有書有不書也金龍口決後命侍郎白昂治之塞決口三十六處而河乃入淮又以河徙入淮終非正道乃自東平至興濟鑿小河十二道引水入大清

河及古黃河以入海量開減河以入清河古人有行之者非臣創為此言也自白昂治後河復決金龍口潰張秋隄以入海命都御史劉大夏治之乃濬賈魯舊河以殺水勢開新河七十餘里導使南行築大行長隄三百餘里用夫十二萬有奇鐵木薪芻不可勝計而張秋之決塞蓋逼河使南行若斯之難也河用全力以爭之必欲北入海人用全力以堵之必使南入淮不能別籌運道而虧國計害民生逆水性以為此亦可謂拙於謀矣及於我朝運道河流皆沿舊制順治康熙年間河之決塞有案可稽大約決北岸者十之九決南岸者十之一北岸決後潰運道半不潰者半凡其潰運道者則皆由大清河以入海者也蓋以大清河之東南皆泰山之基脚故其道亘古不壞亦不遷移從前南北分流之時已受黃河之半嗣後張秋潰決之

日間受黃河之全然史但言其由此入海而已並未聞有衝城郭淹人民之事則此河之有利而無害亦百試而足徵矣目今銅山決口不能收功上下兩江二三十州縣之積水不能消涸故臣言開減河也上游水減則下游水微決口易塞積水早消但河流急設開減河而奪溜以出不可不防故臣言減入大清河也大清河能受黃河之半兼能受黃河之全從前屢試之矣况今三冬水涸即使大溜全出尚不敵秋汛之半則大清河之必能容受可以理揆也但自黃河以至張秋皆係平原曠野恐有漫溢然今年陽武方決決出之水現在張秋境內其所經由不過長垣東明一兩縣耳未聞成災也今於陽武之下開減河其道更近則為患更小亦可以理揆也現今漕舟未上張秋之運道空閑開隄使河東流初無碍也至於運道尤易為力

漕舟北上即從張秋入河順河北流五六日而可至利津
利津去天津之海道不過四五百里且在登萊之上並無
隘阻臣於乾隆三年由海道運登萊之穀三十萬石於天
津刻期可至顆粒無損此親辦之事非空言也即使並此
不敢則又有策焉大清河之經流在山東之北運河之南
岸現開減河數處皆與大清河不遠又滄州以下之宣惠
河臣所疏濬計其下游與大清河甚近開渠通之以達漕
舟亦非難行之事也計大清河所經之處不過東阿濟陽
濱州利津等四五州縣即有漫溢不過偏災忍四五州縣
之偏災而可減兩江二三十州縣之積水並解淮陽兩府
之急難此其利害之輕重不待智者而後知也減河開後
其至張秋不過經兩三州縣之境計其漫溢之處築土埽
以禦之一入大清河則河身深廣石岸堵築之處甚少約

計所費至多不過一二十萬而所省下游決口之工費賑
濟之錢米至少不下一二百萬此其得失之多寡亦不待
智者而後知也是則減河一開所費甚少為害甚輕而決
口可塞積水可消漕舟不誤其利甚大 臣熟思之計無便
於此者故詳言之惟 皇上採擇焉

備陳邊防事宜疏 乾隆十八年

尹繼善

太子太保署理陝甘總督革職留任臣尹繼善謹 奏為
備陳邊防事宜仰祈 聖訓事竊照準噶爾部落僻處
西域習俗强悍性情狡詐與中國西北邊境均屬接壤則
防邊之道甚關緊要近來新撫台吉夷情未定防範之法
更宜加意謹嚴我 皇上聖謨廣運 特遣大臣於
西藏北邊分路前往又因安西哈密孤懸塞外 命永
常努三馳赴防守一切機宜 指示周詳所以為邊疆

籌計者已無微不至永常等荷蒙 聖恩簡用自必盡力邊防臣身膺重任敢不同心共商殫竭愚忱以期先事綢繆仰紆 睿慮於永常等過安西時謹就臣愚昧所知與之詳細講論意見相同所有應行備辦事宜逐條開列陳奏仰祈 睿鑒

一安西將備宜慎選得人也查安西地方孤懸塞外為甘肅之藩籬哈密之保障所設備戰兵三千一遇有警即須稟先起程前往應援則領兵將備甚為緊要必須久歷戎行才具強幹者方為緩急足恃臣留心體察現在安西將備內明幹之員頗為不多迨至有事之時將就委用倘有貽誤關係匪淺臣現咨安西提臣王進泰將安西各營將備詳加考核其實在年力強壯熟諳夷情勇往急公辦事幹練者應行留用外如有循分供職才力中平者即行咨

明臣於陝甘兩省各營內挑選能員另行奏請調補務使安西將備人人可用庶緊要邊疆可以收指臂之助矣一備戰官兵應挑選精銳也查甘涼安肅留各標營備戰兵丁原係為防守邊城應援哈密而設必須人人精銳件件富全有一兵方得一兵之實用從前原議凡備戰各營責成該提標鎮將應派戰兵分定額次預先派定每年點驗一次如有老弱殘疾者即行更換並將領兵將備千把俱行派定以免臨時急遽年來邊方寧靜第恐該管鎮將視為泛常臣現在咨行各提鎮將所有備戰之兵逐名點驗務期漢仗壯健技藝熟練應更換者即行更換不得以老弱之人混行充數一切軍裝器械務須收拾鋒利整理齊全凡將備千把必慎選才具強幹熟悉邊情者指名派定如有事故另行選補以上預備事宜原係常年應辦並

非另事更張總在加倍留心慎熟料理不得虛應故事統
限一律辦齊報明督提衙門分委大員查驗如有奉行不
力怠緩從事者即將該管鎮將嚴叅重處
一備戰馬駝應加意喂養以歸實用也查各處戰兵應需
馬駝從前議定除本營撥用外其不敷之數俱係各鎮標
屬營內就近摘撥一聞口外有信刻難遲緩戰兵起程全
賴壯健馬駝行走迅速必須喂養以時調習如法方得收
其實用誠恐各該將備粗於宴安不能用心料理臣現在
咨行各提鎮將備戰馬駝詳加查驗如有疾應更換者作
速更換如有倒缺尚未買補者作速買補並令加意喂養
用心調習務使一律適用倘有以口老病廢充數或缺額
不即行揭報並勒限查竣報明督提派委大員於閱看戰
兵時一體查驗仍責令各鎮於每年巡查之時通行驗看

具報督提查核如此則馬駝咸歸實用緩急為有備矣
一路徑宜先勘明水草也查哈密如遇有警安西備戰之
兵首先應緩甘涼安肅兵分定額次二次相繼出口其行
走之路由肅州至哈密自橋灣抵東長流水前往共計三
路又安西標協之兵前往哈密一由橋灣一由茨窩泉亦
約抵東長流水會操惟沙州之兵另由可沙石一路抵哈
密各路有八九站郭壁既十站郭壁不等即間或有草不
敷牧放必須裹帶草束其沿途水泉甚是稀少或行數十
里或行一二百里始有一處水泉亦僅足供一二百人馬
及四五百人馬之用三千人之大隊必須分起行走若不
將何處路徑便於行走何處水草足以供若干人馬之用
於平日詳細勘明則臨時分隊之多寡行走之緩急不能
料理得宜未免倉皇失措彼此擁擠萬一水草不敷必至

人馬疲困臣與欽差永常努三再三講論亦以此事為必應籌辦臣現在移咨安西提督分委妥員將通哈道路詳加查勘某處之兵應由某路行走每一千兵應分為幾起如何彼此聯絡前後照應何處水草足供人馬若干春夏情形若何秋冬情形若何一一繪圖貼說咨送臣與永常等酌定行知備戰各鎮營分委明白員弁將所指路徑並有水草去處預先看明則胸有成見庶臨時不費周章而兵丁不至苦累矣

一派防哈密兵丁應酌帶鳥鎗以資禦侮也查哈密防兵二千所需鳥鎗從前善後案內照操演陣勢配用弓箭鳥鎗牌刀之數於哈密舊存軍需餘剩鎗內留給防兵鳥鎗一千八十桿又留鎗二百三十餘桿以備損壞更換此外又另給回民鳥鎗一百桿令其協同防守嗣經陞任安西

提臣永常以藤牌挑刀等項係口外無用之具奏准停止令兵丁專習弓箭鎗砲此後各標營派防之兵每百改派鎗手七十名共派鳥鎗兵一千四百名哈密留守之鎗不能敷用現經安西提臣王進泰於安西餘鎗內撥足其各標營派防之兵本營鳥鎗歷來並不攜帶第思鳥鎗一項最為利器防兵抵哈之後各該鎗手兵丁雖俱有鎗應用但自各該營以至哈密長途行走空手前往設中途遇有警報何以赴援或遇賊人邀截何以應敵皆不可不為意外之慮應請嗣後甘涼安肅四標營每處派換防守兵丁各帶鳥鎗二百桿應需鉛藥等項一并隨帶酌量添給駝載於撤防時仍將原鎗照數帶回如此則換防之兵添有器械沿途既得防禦而抵哈以後設遇緊急多有鳥鎗數百桿凡弓箭兵丁以及客民內能放鎗者均可執以防守

器械充足捍禦有資於防務更有裨益

一哈密防所鉛藥宜多為預備也查哈密兵丁防守城堡火器關係緊要鉛藥等項必須寬餘備貯茲准安西提臣王進泰轉據防鎮冶大雄查報防兵需用鉛藥等項向照實在兵額估支造報若遇風雪停操等項歷年俱有節省現在共節存鉛丸二萬二千五百餘觔火藥二萬八千八百餘觔請將此內酌量備貯餘但留為操演之需肅州本年現製火藥暫停解送等因臣查哈密防兵需用鉛丸向在哈密公庫軍需餘存項內動支其所需火藥因哈密遠處塞外一切硝磺物料素非出產是以由內地州縣製造解送在平時無事之際自可陸續輓運供支設遇急需臨時猝辦則緩不及事今歷年用過鉛藥既有節存貯庫邊防重地多為預備實有裨益臣現又奏請添駐防兵多撥

烏鎗則將來需用之數較前益多倘遇有事援兵糧餉不能多帶鉛藥亦須臨時接濟應將前項餘存鉛藥統作哈密備貯另行造冊報部其肅州所製火藥仍行按年解送以供操防嗣後如有節省鉛藥據實報出在于下年應支數內扣除節省按數減造仍將預備火藥照依內地標營之例按年出陳易新以昭畫一通融統計于限銷案內分晰報部查核 奏銷如此庶備貯充裕而緩急足恃矣 一哈密兵糧宜預為籌酌也查哈密防兵口糧係計口授食必須積貯充盈方為有備無患如俟臨期撥運未免迫不及待從前軍需案內存哈糧石原屬豐裕除歷年公支外現在哈密舊存米麥二色三萬餘石加以前任藩司楊應琚奏請撥運沙柳二衛小麥二萬五千石通計不及六萬石之數以現在防兵二千約計供支五六年如蒙

恩准加增防兵一千僅可供四五年之需若從內地撥運程途寫遠需費浩繁自應預為籌計檢查善後案內原議安西等處遇有收之年酌量採買以供備貯乾隆六九等年節次議請動項採買安西沙柳等衛共買過糧十餘萬石已有成效應請照依原議于各衛地方酌量採買餘糧以備緩急又沙洲衛額貯小麥一萬餘石供支兵糧並戶民借給籽種等項歲需三萬餘石但籽種以秋成後交還每年又有額徵糧石餘糧儘多應請於每年農隙之時在沙洲衛倉內動撥小麥數千石運往哈密所需腳價查照成例給發如此源源接濟邊貯得以充盈不致臨時周章矣至安西一帶或遇糧石不敷應用肅州現貯各色糧二十餘萬石即可隨時就近撥運無虞缺乏合併陳明一分貯銀兩宜就近酌備也查雍正年間各府州縣分貯

銀三萬兩嗣准部咨各省直隸州之銀或貯司庫或寄貯于附近之府庫隨將肅州收貯銀兩提至甘州府庫寄貯但查肅州地處極邊所派備戰兵丁為首先出口應援之師一聞哈密警信立即起程一切支應必須立時給發勢難刻緩而肅州額徵之銀本屬無幾無可墊應若赴甘州支領往返須時未免迫不及濟臣照各省直隸州有經徵錢糧之責款項繁多加以分貯銀兩易致混淆是以從前定議改歸府庫以杜虧挪等情弊今肅州現有道員駐劄應請將甘州府寄貯肅州銀兩於甘肅道庫存貯以備急需實為有益至備貯銀兩均應實貯無缺方能應急查平涼西寧二府備貯並甘州府寄貯肅州銀兩內有節年借支墊應等項較原貯之數多有不敷支應殊有未便臣現將凡有備戰兵丁營分逐一查明如有缺少應請一併在於

司庫查款撥足庶幾供支有備戰兵行走得以迅速矣
一哈密一帶城垣宜修理堅固也查防邊之道重在堅壁
固守而固守之道要在城堡堅完哈密有新舊二城回民
又有分駐五堡一遇有警即須將回民牲畜收入城堡協
力守護使賊人進不能攻退無所掠以待援師即為制勝
之法是城堡所關實為緊要哈密新城以雍正五年動項
興修其回民各城堡前于善後案内已令回民逐一修理
但為日已久恐有風雨剝削踐踏損傷之處不可不未雨
綢繆臣咨行安西提鎮並安西道委員查勘如有損壞之
處應動項者即酌請動項修補如應回民修理者即督令
回民自修其一切砲臺牒樓俱令逐一查驗收拾完整安
西沙洲靖逆橋邊一帶城隄如有殘缺亦查明一律貼補
並須安靜辦理不必過於張皇以駭聽聞庶塞外城垣俱

有金湯之固可以有備無患再哈密火藥已于城外另築
圍牆收貯雖係通連大城周圍牆垣甚屬單薄難免疎虞
自應加高培厚與大城相等方為妥協臣現在咨行提鎮
詳細確查統俟查明分別咨題一面即行辦理
一哈密牧畜種地宜在附近處所也查哈密遠處塞外切
近準夷如卡倫報警凡散處回民及一切牲畜均須收入
城堡堅壁拒守是以從前奏定每年九月初一日以後防
冬之際官兵馬匹即上槽喂養回民牲畜俱令於城堡附
近廠內牧放如相近塔爾納沁之巴達山暨大小天生圖
東榆樹溝滄學溝等處相距哈城遙遠向來不許回民前
往耕牧近因盜謚日久哈密回民不能思患預防因有前
往各該處耕種牧畜者萬一準夷侵犯邊界急切不能收
回殊有關係應責駐哈總兵詳細確查並令哈密員子玉

素富曉諭回民務在近處屯種不得遠赴沁城一帶如有
已經耕種者於秋穫之後速行收回回民牲畜甚屬有限
無論冬夏俱令在近處牧放並不時稽查勿令任意遠去
庶一聞警信均得隨時奔入城堡堅壁清野不致有意外
之虞矣

請嚴口外各廳巡查疏乾隆十八年方觀承

直隸總督臣方觀承謹奏為請嚴口外各廳之巡查以
重地方事竊照熱河屬五廳十巡檢司武職分隸一協四
營之十二汛地方遼濶不下數千里在在崇山峻嶺僻峴
深溝一切遠來墾荒就食之民皆散處其間復遠逾邊境
與蒙古錯處其中安分者固多而匪類亦復不少向來各
廳屬就民人居址流寓處所每處設牌頭一名合數牌頭
設鄉長一名合數鄉長設鄉約一名其蒙古地方教漢柰

曼翁牛特土默特各處流寓民人附近歸入八溝塔子溝
等廳管轄亦設有鄉牌等責令互相稽查並呈報命盜等
事唯是各鄉牌等亦係不根之民未可即恃以為約束而
口外又因汛廣兵單墩撥遼遠且蒙古地界更非營汛所
轄是稽查之法不密則耳目即屬難周臣欽承 聖訓
諄詳務求邊圉寧謐惟有文武互相巡查定期立法加密
於前使山僻之區常有官兵經臨往來查察則鄉人等自
不敢容納奸匪瞞官作弊而其力為可用臣查文職有道
廳巡檢等員分別巡查應令巡檢各於所轄地方每季巡
查一次廳員相驗會審公出之時本多應令於所過村莊
並附近山僻之地以次巡查務無遺漏熱河道應於所屬
地方每年巡查一次臣思該道事務尚屬簡少而分巡原
屬道員專責應令改為一年兩次巡查以重責成武職有

副將都守千把外委等員其專防一汛之千總外委地界不遠原應接織巡防不許在汛偷安應令於交界處按半月彼此會哨一次四營都司守備每季各於所轄汛內巡查一周河屯協副將每年兩次查閱營伍即令遍為巡歷其汛地僻遠者更須親到以資彈壓至教漢柰曼翁牛特土默特等處向無營汛除令附近管轄之廳員巡檢隨時稽查並熱河道與各旗及各部員等員令辦公務之便親歷巡查外臣復查土默特東南鐵溝地方向年因有逃匪繁集滋事議令熱河總管按每年前往巡查一次自改設熱河副都統以來至今仍循舊例臣查鐵溝東距熱河約七百餘里鐵溝西北即係教漢柰曼翁牛特土默特等處邊界民人流寓之所鐵溝西至熱河稍紆其路即可兼查一周以補營汛之所不及如此則處處皆有所稽查復時

時警動其耳目庶良民益知畏法而奸匪無所容身所有巡查會哨各地界限章程容臣移行該副都統並該道協等各按地方切實情形另行籌酌咨部備案至於保甲最為稽匪良法口外各廳雖不能悉照內地然亦可仿照行之應令稍為變通不必限以每甲十家之數祇就一村烟戶之多寡酌量編立其零星散户不成村落者即三四家亦可自為一甲先令該管巡檢挨戶編查每戶給一門牌懸掛開明籍貫姓名口數年貌生業仍以原設牌頭領之凡有新來形跡可疑之人一概不許容留違者治以連坐之罪其有依親靠友貿易傭趁實有歸著者令其報明廳巡添入門牌許其居住其蒙古界內種地民人亦令一例編次給與門牌按現在各戶務使歲有減汰不許增添凡新來民人即係依親靠友亦不准其容留如有吃酒行

允偷盜生事不法之徒即稟明各該廳查究驅逐其門牌所需紙張筆墨之費即令該廳於公費內動用嚴禁藉端科派仍令熱河道於出巡之次逐村抽查如有查辦不實及容留無籍之人將該管廳官分別記過叅處其鄉牌人等即行責治簽換如此則匪竊既難託足而散處之流寓民人皆有數可稽於以戢奸暴而安善良較之祇設鄉牌又為周密矣臣因口外山境僻遠奸良叢雜務在稽察嚴密謹抒愚昧之見恭摺陳 奏

陳賑務及隄工疏乾隆十八年

鄂容安

兩江總督臣鄂容安謹 奏為奏明事竊臣於本月初十日銅山工次起程取道睢寧邳州宿遷桃源清河一路赴淮由清口高堰山盱順隄查勘十七日抵蔣京壩所有勘明水勢隄工情形與臣嵇璜等恭摺會奏臣沿途留心體

察賑務復面與按察使許松侉等詳加講論隨時催督妥辦並籌災重各邑明春接濟其續因成災分數加重之處亦已查明核實補給民情均屬安貼冬月以來天氣雖尚暖和而嚴冬在即煮粥一事應在十一月內舉行今經撥米設廠預為料理其勸諭典商人等捐備棉襖陸續據報已收有成數各州縣多在一千件上下亦即行令速解以備發給高堰隄工所需石料向來所辦不足丈尺以致工程不能堅固若今次仍復碎小雖必駁回重辦然曠日廢時猶恐遲誤是以先行馳札飭知令其窻大毋小並催速辦臣又慮山東分辨一半路途稍遠或不能如期速到因查得江寧蘇州常州三府已共有六處可採俱發銀委員分督採辦並據報已開工趨辦務令隨得隨運源源到工以期早為竣事臣一俟勘辦下河疏鑿事宜定局後即往

山東催督斷不使之遲誤致屢 聖懷十六日在高堰
接奉 硃批 臣前摺荷蒙 訓示周詳 臣當悉心體

認期於行之得宜至撫臣衛哲治莊有恭性情質地誠如

聖明洞鑒即如辨災一事衛哲治所見在於寔濫毋
遺臣思卹災極患 皇上固不恤千百萬帑金使無一

夫不得其所然愚民之奢望無窮 國家之經制有定使

明知其不應得而與之則必有應得而反不與者矣外省

習氣專事揣摩意指若屬員知上司意在於寬則沽名釣

譽假公濟私何所不至且冒濫之端一開不特虛糜帑項

更恐實在災民反致遺漏水旱事所常有今不深思後將

難繼是以就 臣所見已向衛哲治愷切言之江蘇吏習向

來疲玩因循撫臣莊有恭意在整飭或有不及詳查之處

然論其本心尚非刻薄 臣每與言論竊謂振作不在於立

威而姑息非所以為愛養平時與屬吏教誡不先迨至有
事徒繩以法是屬吏之獲罪上司實有以成之惟嚴憚於
外不取浮名體恤於中得使展布庶地方期有裨益目下
辦理災務之各州縣或有心苛刻罔恤災黎或故意市恩
虛糜帑項以及濫容胥役地保冒濫侵漁皆在所當斥若
出於偶爾疎忽或限於尚未諳練以致稍有不妥則過屬
無心止應隨時改正分別記過申飭以觀後效倘遽行叅
斥另易生手所易之員未必即勝前人於賑務徒見紛更
轉有延誤 臣以此詳諭莊有恭伊亦以 臣前言為然至 臣
等身受封疆之寄責任重大若扶同遷就止博和衷之名
不顧公事之實誠為上負 主知若急自炫所長矯情
立異必致意見參商有乖政體非協恭共濟之義屬員無
所適從其中不肖者乘機離間暗中播弄非端甚微為害

甚大臣與衛哲治莊有恭前日面商論及於斯期共相檢
點有事則共相妥計不存成見勿聽浮言惟求一是以仰
副 皇上教誨成全之至意緣蒙 恩諭故敢縷陳

伏祈 訓示

請舉秋報大禮疏乾隆十八年

龔學海

光祿寺少卿加一級 臣龔學海謹 奏為請舉秋報大禮
以備祀典以崇 聖治事臣竊惟王者父天母地事天
一如事親宗廟之禮禘祫而外四時備享其祀天也冬圜
丘春祈穀夏大雩至享帝則秋祭也唐虞三代以來典制
雖異而祀義則同簡冊具存班班可考我 皇上乘乾
御宇敬 天勤民祈穀冬祀諸大禮每歲 躬親復
特舉常雩示為民祈禱至意古制備祀事明千載一
時也所猶未舉行者季秋享 帝大祀耳臣聞雩祈也

祈百穀之雨也享報也報百穀之成也有祈必有報祭之
禮也且夫祭天所以法天四德備而為乾四時具而成歲
秋享之祭協春祈以伸崇報歲祀全而天人合 聖天
子隆舉斯禮端在今日 臣謹按季秋享帝之文載在月令
而秋祀昊天上帝開元禮亦復可稽程子云古者一年之
間祭天甚多春則因民播種而祈穀夏則恐旱暵而大雩
以至秋則明堂冬則圜丘皆人君為民之心也欽惟我

皇上愛養黎元有加無已當夫萬寶告成普天豐樂皆

上天錫佑之恩仰祈 皇上舉行季秋享 帝

大祀以答 天庥以合於四時備祭之義洽四海之歡

心益展 聖主敬 天勤民至意百司羣僚曷勝忭

舞至其規制儀文之詳仰祈 勅下禮臣敬謹集議恭

呈 睿鑒要於酌古宜今斯所為式來茲而光前牒者

也微臣學識陋典禮未諳何敢冒昧陳奏仰竇天
聽但幸際禮樂明備之時承乏執事奔走之末敬獻芻蕘
用抒忱悃無任悚惕屏營之至

請舉行蜡祭疏乾隆十八年

曹秀先

浙江道監察御史降一級留任臣曹秀先謹 奏為誠能
動物德廣好生敬抒鄙見恭祈 聖鑒事臣竊觀邇來
近畿郡縣蝗災間發仰蒙我 皇上特遣大臣侍衛勤
督地方有司實力撲捕 天語悚切懲賞攸昭毋令滋
生貽害田稼似此視民如傷誠求保赤之心固 上天
所垂鑒下民所共感者臣嘗讀小雅大田之詩曰去其螟
螣及其蠹賊無害我田穉田祖有神秉畀災火蓋言致禱
於神默除害也唐臣姚崇遣使捕蝗引此為證夜中設火
火邊掘坑且焚且瘞宋臣朱熹亦以為古之遺法如此他

若史書所云蝗不入境又或一夕飛沉東海未必概屬附
會而禮言蜡祭七日昆蟲宋儒陳澧注為螟蝗之屬又知
螟蝗有靈亦得與於祭也蓋從來物類雖微各受一命物
性雖蠢咸格於誠易中孚之彖曰信及豚魚前聖所言幽
明合契是以驅虎祭鱷摘文禱祀著有明徵今蝗蝻蝻蚱
雜然並生蝟蝻蠕蠕不可勝計要亦各分造物之微命憲
其害我田稼苦我百姓勢不得不遵古法竭力撲捕然食
苗亦死不食苗亦死此則情法俱窮之時也臣諱思螟蝗
得與於祭之義雖當蜡索曷若及時前者夏間少雨官司
禱求不聞徵應迨我 皇上虔祈甘霖立沛德且足以
格 天誠自可以動物敢懇 皇上萬幾之暇
御製祭文一道頒發郡縣遇有蝗蝻之地即行敬謹騰黃
虔具酒楮張幕焚香告祭於神俾蠹茲蝗蝻限以一日二

日適跡於荒曠之野宿莽之墟各逃生命逾期不用命官吏鄉保多倍人數竭力撲滅既以廣 聖人好生之德自當切為民請命之誠 臣料田祖有神陰相除殄必不復留遺育以滋擾於青疇綠野中也可否仍於冬令考稽故典舉行蜡祭以合禮經之義恭候 皇上欽定抑 臣更有請者舊時州縣捕蝗多係捐辦今奉 恩旨許令動公該州縣更不得藉口無力但一法立即一獎生州縣意必報多上司以其報多駁詰往返愈繁案牘請嗣後捕蝗時雇募夫役用支錢糧須令同城教職佐雜一面會同給發一面即簽書名押開報該管上司查核至奏銷時准為定據並嚴飭不得假手家人書吏致滋混冒以往年恩賜絹米煮賑等件尚有冒銷其弊不可不預防也 臣言是否可採伏祈 皇上睿鑒訓示

請嚴鄉飲報部之例疏乾隆十八年 張若震

西安布政使 臣張若震謹 奏為請嚴鄉飲報部之例以杜冒濫以重 大典事竊查鄉飲一事禮載聖人制之以道鄉人是以賓主象天地介僕象陰陽三賓象三光所以明尊長所以明養老俾民知尊長養老之義而孝弟之行立典綦重也 聖朝飭令直省舉行務擇齒德兼優者當之載在令甲而各省奉行不一有一歲正月十月舉行二次者有祇於十月中舉行一次者有舉大賓介賓耆賓各一人者有舉大賓一人僕賓二三人者相沿日久或亦慎重將事或且視為具文或以無人堪舉頻年闕略或由州縣官舉報督撫批示奉行或止報藩司而不及督撫章程既有參差典禮亦未畫一行之未能慎重所舉難期悉當甚至既與鄉飲之後間有過犯漫無稽核似於 大典

未協臣愚以為十室之邑必有忠信豈一州一縣之中竟無年高德劭之士堪示儀型是闕畧固所不可而冒濫尤所當嚴應請 勅下部議嗣後鄉飲酒禮各省畫一每歲十月中舉行一次務令州縣官確加遠訪於紳士中舉一人為大賓者庶中舉一人為介賓一人為耆賓均擇齒德兼優鄉黨推重之人詳報府司督撫核實推准遵照禮文所載鄭重舉行一面將姓名籍貫報部存案既與鄉飲之後倘有行止不堪犯案到官詳報咨部斥革仍將原舉州縣議處如此則不致所舉非人而克副 大典者自必共以為榮即身膺舉報之責者亦不敢漫乎從事庶閭閻咸知觀感似于人心風俗不無裨益是否有當伏祈

聖鑒訓示

皇清奏議卷四十八

67
1/4
481

1111

終

